

摘藻堂四庫全書薈要

子部

欽定四庫全書薈要

子部

御定淵鑑類函卷五十九

詳校官兵部主事臣雷純



欽定四庫全書薈要卷一萬一千五百七

子部

御定淵鑑類函卷五十九

儲宮部

太子

增太孫

太子妃

太子一

卷五十九

易曰黃離元吉象曰明兩作離大人以繼明照於

四方

王肅注曰兩離相續明之義也

尚書洪範五行傳曰心之大星

天王也其前星太子也後星世子也

藝文類聚

韓嬰詩外

傳曰五帝官天下三王家天下家以傳子官以傳賢故

自唐虞已上經傳無太子稱號夏殷之王雖則傳嗣其

文略矣至周文始見文王世子之制

初學記

禮記曰文

王之為世子朝於王季日三雞初鳴而衣服至於寢門
外問內豎之御者曰今日安否何如內豎曰安文王乃
喜及日中又至亦如之及暮又至亦如之其有不安則
內豎以告文王色憂行不能正履王季復膳然後亦復
初食上必在視寒煖之節 又曰國君世子生告於君
接以太牢宰掌具 又曰王太子王子羣后之太子卿

大夫元士之適子凡入學以齒 又曰行一物而三善

皆得者唯世子而已其齒於學之謂也其一知父子之
禮其二知君臣之義其三知長幼之節故學為父子焉
君臣焉長幼焉一人元良萬國以貞世子之謂也 白

虎通曰天子之太子諸侯之世子皆就於外者尊師重
先王之道也故曲禮曰禮有來學不聞往教也 賈誼

書曰文王使太公望傅太子發嗜鮑魚公不與曰鮑魚
不登俎豈有非禮而可養太子哉 尚書曰惟四月太

子發上祭於畢下至於盟津之上乃告司馬司徒司空
又曰太子發升於舟中流白魚入於舟王跪取出俟
以燎羣公咸曰休哉 左傳曰九月丁卯子同生以太
子之禮舉之接以太牢士負之士妻食之公與文姜宗
婦命之 尚書大傳曰天子太子年十八曰孟侯孟侯
者於四方諸侯來朝迎於郊者問其所不知也 春秋
外傳曰靈王二十二年穀洛龍鬪將毀王宮王欲壅之
太子晉諫曰晉聞古之長民者不隳山不崇藪不防川

不竭澤靈王不從 又曰師曠見太子晉曰吾聞太子

之語高於太山願聞一言太子曰吾聞太師之來喜而
又懼汝知人年長短吉凶也師曠曰君色赤君聲清火
色不壽太子曰然却後三年吾上賓於帝汝慎無言殃
將及汝太子時年十五後三年而卒 史記曰厲王出
奔彘太子靜匿召公之家國人聞乃圍之召公以其子
代王太子太子得脫召公周公二相行政號曰共和十
四年厲王死太子靜長於召公家二相乃共立之是為

宣王也

藝文類聚

白虎通曰何以知天子之子稱世子春

秋傳曰王世子會于首止是也何以知天子之子稱太子尚書曰太子發升于舟是也或云諸侯之子稱世子則春秋傳云晉有太子申生鄭有太子華齊有太子光由是觀之周制太子世子亦不定也漢制天子稱皇帝其嫡嗣稱皇太子諸侯王之嫡稱世子後代咸因之

初學

記

史記曰上欲廢太子立趙王如意大臣諫爭未得

堅決張良為畫計曰顧上不能致者商山四人今能無

愛金玉使太子卑辭厚禮迎此四人則一助也於是四人至侍太子入讌年皆八十餘眉鬚皓白衣冠甚偉上怪問之四人各以名對帝大驚曰吾求公數歲常避逃我今何從吾兒遊四人去上目送之指示戚夫人曰彼四人輔之羽翼已成難可動矣漢書曰孝景王皇后武帝母也內太子宫太子幸愛之生三女一男男方在身時王夫人夢日入其懷以告太子曰此貴徵也未生而文帝崩景帝即位王夫人生男是為武帝又曰孝

元皇帝宣帝太子也母曰許皇后宣帝微時生民間年
二歲宣帝即位八歲立為太子壯大柔仁好儒 又曰
孝成皇帝元帝太子母曰王皇后元帝在太子宮生甲
觀畫堂為世嫡皇孫宣帝愛之字曰太孫常置左右年
三歲而宣帝崩元帝即位立為太子壯好經書寬博謹
慎初居桂宮上嘗急召太子出龍樓門不敢絕馳道西
至直城門得絕乃度還入作室門上遲之問其故以狀
對上大悅乃著令太子得絕馳道 東觀漢記曰建武

時天下墾田不實詔下州郡檢其事帝見陳留吏牘上有書曰潁川弘農可問河南南陽不可問帝詰吏抵言於長壽街得之帝怒時明帝年十二在幄後曰吏受郡勅當欲以墾田相方耳帝曰即如此何故言河南南陽不可問對曰河南帝城多近臣南陽帝鄉多近親田宅踰制不可為准帝令詰問乃首服如顯宗言又曰孝明皇帝世祖中子也母光烈皇后初讓尊位為貴人故帝年十二以皇子立為東海公三歲進爵為王幼而聰

明叡智容貌壯麗世祖異焉數問以政議應對敏達謀慮甚深溫恭好學敬愛師傅所以承事兄弟親密九族內外周洽世祖愈珍上德後立為皇太子後漢桓榮傳曰建武十九年年六十餘始辟大司徒府時顯宗始立為皇太子選求明經乃擢榮弟子豫章何湯為虎賁中郎將以尚書授太子世祖問湯本師為誰對曰事沛國桓榮帝即召榮令說尚書甚善之拜為議郎入使授太子每朝會輒令榮於公卿前敷奏經書帝稱善曰得

生幾晚 魏略曰太祖不時立太子太子自疑是時高
元呂者善相人乃呼問之對曰其貴不可言因問壽幾
何元呂曰其壽至四十當有小苦過是無憂後無幾立
為太子 魏志曰明帝文帝太子生而愛之常令在左
右數歲而有岐嶷之姿武帝異之曰我基於爾三世矣
每朝讌會同與近臣並列帷幄好學多識特留意法理
吳志曰孫登權長子也立為太子選置師傅詮簡秀
士以為賓友諸葛恪為左輔張休為右弼顧譚為輔正

陳表為翼正為四友於東宮號為多士登鎮武昌或時

獵當由徑道常避遠良田不踐苗稼至所憩止又擇空

閒之地不欲煩民 王隱晉書曰初武帝未為世子文

帝問裴秀人有相否秀曰中撫軍立髮至地手過於膝

人望既茂天表如此非人臣之相 又曰愍懷太子名

適少聰慧帝愛之六七歲時帝夜望火太子牽上衣裾

使入閣中上問其故太子對曰暮夜倉卒宜備非常不

當親近火光令人照見 世說曰晉明帝數歲在元帝

處坐時有人從長安來帝謂曰爾言長安遠日遠明帝
曰只聞人從長安來不聞從日邊來日固宜遠帝大嗟
賞明日羣僚並集帝更問乃答云日近帝失色乃謂曰
何以昨語異答曰出門見日不見長安衆莫不嗟歎

藝文

類聚增經濟類編曰北魏主殂太子少傅崔光將軍于

忠詹事王顯中庶子代人侯剛迎太子謂於東宮至顯
陽殿王顯欲須明行即位禮崔光曰天位不可暫曠何
待至明顯曰須奏中宮光曰帝崩太子立國之常典何

須中宮令也於是光攝太尉奉冊進璽綬太子跪受服
衮冕之服御太極殿即皇帝位光等與夜直羣官立廷
中北面稽首稱萬歲廣平王懷扶疾入臨徑至太極西
廡哀慟呼侍中黃門領軍二衛云身欲上殿哭大行又
須入見主上衆皆愕然相視無敢對者崔光攘袂振杖
引漢光武崩趙熹扶諸王下殿故事辭色甚厲聞者莫
不稱善懷聲淚俱止曰侍中以古義裁我敢不服遂還
太平御覽梁昭明太子母丁貴嬪有疾太子還永福

省侍疾衣不解帶及薨步從喪還宮至殯水漿不入口
每哭慟絕武帝諭旨曰毀不滅性聖人之制不勝喪比
於不孝有我在那得自毀如此可即強進飲粥太子奉
勅乃進數合自是至葬日進麥粥一升帝又勅曰聞汝
所進過少轉羸瘦我比更無病正為汝如此胸中亦圯
塞成疾應強加饘粥不使我恒爾懸心雖屢奉勸逼終
喪日止一溢不嘗菜菓之味體素壯腰帶十圍至是減
削過半每入朝士庶見者莫不下泣 經濟類編曰太

宗立太子遇物則誨之見其飯則曰汝知稼穡之艱難
則嘗有斯飯矣見其乘馬則曰汝知其勞而不竭其力
則嘗得乘之矣見其乘舟則曰水所以載舟亦所以覆
舟民猶水也君猶舟也見其息於木下則曰木從繩則
正后從諫則聖 又曰太宗作帝範十二篇以賜太子
曰君體建親求賢審官納諫去讒戒盈崇儉賞罰務農
閱武崇文且曰修身治國備在其中一旦不諱更無所
言矣又曰汝當更求古之哲王以為師如吾不足法也

夫取法於上僅得其中取法於中不免為下吾居位以
來不善多矣錦繡珠玉不絕於前宮室臺榭屢有興作
犬馬鷹隼無遠不致行遊四方供頓煩勞此皆吾之深
過勿以為是而法之顧我弘濟蒼生其益多肇造區夏
其功大益多損少故人不怨功大過微故業不墮然比
之盡美盡善固多愧矣汝無我之功勤而承我之富貴
竭力為善則國家僅安驕情奢縱則一身不保又曰
上疑太子柔弱密謂長孫無忌曰雉奴懦弱不能守社

稷吳王恪英果類我我欲立之何如無忌固爭以為不可上曰公以恪非已之甥耶無忌曰太子仁厚真守文良主儲副至重豈可數易上乃止

唐書載恪善騎射有文武才其母隋煬帝

女也地親望高中外所向太宗欲更立恪長孫無忌固爭而止由是無忌惡恪永徽中房遺愛謀反因遂誅恪以絕天下望恪臨刑呼曰

社稷有靈無忌且族滅

唐書曰太子弘仁孝未嘗

有過而后將逞志弘奏請數拂旨上元二年從幸合璧宮遇酖薨天下莫不痛之詔謚孝敬皇帝又曰節愍太子重俊率李多祚等矯發羽林兵殺武三思崇訓并

其黨十餘人帝召右羽林將軍劉仁景等拒之兵敗死
經濟類編曰睿宗將立太子以宋王成器嫡長平王
隆基有功疑不能決成器辭曰國家安則先嫡長危則
先有功苟違其宜四海失望臣死不敢居平王之上劉
幽求曰除天下之禍者當享天下之福平王拯社稷之
危救君親之難論功語德無可疑者上從之又曰太
平公主與益州長史竇懷貞等結為朋黨欲以危太子
睿宗嘗密召韋安石謂曰聞朝廷皆傾心東宮御宜察

之對曰陛下安得亡國之言此必太平之謀耳太子有
功於社稷仁明孝友天下所知願陛下無惑讒言睿宗
瞿然曰朕知之矣卿勿言時公主在簾下竊聽之以飛
語陷安石公主又嘗乘輦邀宰相於光範門內諷以易
置東宮衆皆失色宋璟抗言曰東宮有大功於天下真
宗廟社稷之主公主奈何忽有此議頃之睿宗謂侍臣
曰術者言五日中當有急兵入宮卿等為朕備之張說
曰此必讒人欲離間東宮願陛下使太子監國則流言

自息矣姚崇曰說所言社稷之至計也睿宗悅太平公
主蒲州安置命太子監國六品以下除官及徒罪以下
並取太子處分唐書曰武惠妃寵幸傾後宮生壽王
瑁愛與諸子絕等而太子瑛鄂王瑤光王琚各以母失
職頗怏怏惠妃謀傾太子帝召宰相議欲廢之張九齡
固爭以為不可惠妃密使宮奴牛貴兒謂九齡曰有廢
必有興公為之援宰相可長處九齡叱之以其語白帝
帝默然而止及九齡罷李林甫專政數稱壽王美以摠

妃意惠妃又譖太子二王謀反遽召宰相林甫議答曰
此陛下家事非臣所宜預帝意決乃詔太子瑛鄂王瑤
光王琚同惡均罪並廢為庶人尋遇害天下冤之號三
庶人 又曰帝之為太子也值太平公主構逆左右悉
持兩端凡宮中動止必以聞帝不自安會楊良媛方娠
密語侍讀張說身且不保奈何育子命挾劑以入密於
曲室煮之若有介而戈者環鼎三由是三煮盡覆以告
說曰天命也乃止生男是為肅宗 又曰肅宗在東宮

李林甫陰搆不測太子內憂鬢髮斑禿後入謁帝見不
悅因幸其宮顧庭宇不汛掃樂器塵蠹左右無嬪侍帝
愀然謂高力士曰兒居處乃爾將軍臣使我知乎詔選
京兆良家子五人虞侍太子力士請取掖庭衣冠子畀
之詔可得三人而吳氏在其中因蒙幸忽寢厭不寤太
子問之辭曰夢神降我介而劒決我脇而入死不能堪
燭至其文尚隱然生代宗為嫡皇孫三日帝臨澡之孫
體孱弱負姆嫌陋更取他兒以進帝視之不樂姆叩頭

言非是帝曰非爾所知趣取兒來於是見嫡孫帝大喜
向日視之曰福過其父帝還盡留內樂宴具顧力士曰
可與太子飲一日見三天子樂哉 經濟類編曰建寧

王侯既為張良姊所構肅宗怒而幽死又欲搖動代宗
至德三載捷書至鳳翔肅宗召李泌於長安泌從容求
去帝堅留之泌言五不可留肅宗良久曰卿以朕不從
卿北伐之謀乎對曰非也所不敢言者乃建寧耳帝曰
建寧朕之愛子為小人所教欲害其兄圖繼嗣朕以社

稷大計不得已而除之耳泌曰若有此心廣平當怨之
廣平每與臣言其冤輒流涕嗚咽臣今辭陛下去始敢
言之耳帝曰渠嘗夜捫廣平意欲加害對曰此皆出讒
人之口豈有建寧之聰明孝友肯為此乎且陛下昔欲
用建寧為元帥臣請用廣平建寧若有此心當深憾於
臣而以臣為忠益相親善陛下以此可察其心矣肅宗
乃泣下曰先生言是也既往不咎朕不欲聞之泌曰臣
所以言之者非咎既往乃欲陛下慎將來耳昔天后有

四子長曰太子弘天后方圖稱制惡其聰明醜殺之立
次子雍王賢賢內憂懼作黃臺瓜辭以感悟天后天后
不聽賢卒死於黔中其辭曰種瓜黃臺下瓜熟子離離
一摘使瓜好再摘使瓜稀三摘猶為可四摘抱蔓歸今
陛下已一摘矣慎無再摘肅宗愕然曰安有是哉自是
廣平始安 又曰郃國大長公主適駙馬蕭升主女為
太子妃或告主淫亂且為厭禱德宗大怒幽主於禁中
切責太子太子不知所對請與蕭妃離婚德宗召李泌

告之且曰舒王近已長立孝友溫仁泌曰陛下惟有一

子奈何欲廢之而立姪德宗勃然怒曰卿何得間人父子誰語卿舒王為姪者對曰大厯初陛下語臣今日得數子臣請其故陛下言昭靖諸子主上令吾子之今陛下所生之子猶疑之何有於姪舒王雖孝自今陛下宜努力不復望其孝矣自古父子相疑未有不亡國覆家者臣敢以家族保太子必不知謀鄉使楊素許敬宗李林甫之徒承此旨已就舒王圖定策之功矣上曰為卿

遷延至明日思之太子遣人謝泌曰若必不可救欲先
自仰藥何如泌曰必無此慮願太子起敬起孝間一日
上開延英閣獨召泌流涕撫其背曰非卿切言朕今日
悔無及矣太子仁孝實無他也泌拜賀因曰陛下聖明
察太子無罪臣報國畢矣唐書曰憲宗時惠昭太子
薨是時遂王嫡而澧王長多內助帝將建東宮詔崔羣
為澧王作讓表羣奏大凡已當得則讓不當得之烏用
讓今遂王嫡宜為太子帝從其議後穆宗立以吏部侍

郎召之勞之曰我為太子卿力也羣曰此先帝意臣何力焉且陛下向為淮西節度使臣起制草其言有能辨南陽之牘允符東海之貴先帝然之則傳付久矣 經

濟類編曰後唐北都留守從榮年少驕狠不親政務唐主遣左右往諷導之其人謂曰河南相公恭謹好善親禮端士有老成之風相公齒長宜自策勵勿令聲問出河南下從榮不悅退告楊思權曰吾其廢乎思權因勸從榮多募部曲繕甲兵陰為自固之備其人懼以告馮

贊贊密奏之唐主召思權詣闕亦弗之罪及贊入為宣

徽使謂執政曰從榮剛僻而輕易宜選重德輔之史館
修撰張昭遠亦言古者人君即位則建太子所以明嫡
庶之分塞禍亂之源今卜嗣建儲臣未敢輕議至於恩
澤賜與之間婚媾省侍之際嫡庶長幼宜有所分示以
等威絕其僥冀唐主賞歎其言而不能用 又曰宋太
宗在位久儲貳未立馮拯等上疏言之帝怒斥之嶺南
中外無敢復言者寇準自青州召還入見帝問諸子孰

可以付神器者準曰陛下為天下擇君謀及婦人中官不可也唯陛下擇所以副天下望者帝俛首久之屏左右曰襄王可乎準曰知子莫若父聖意既以為可願即決定遂以元侃為開封府尹進封壽王元侃帝第三子也又曰元侃既為皇太子更名恒大赦自天祐以來中國多故立儲之禮廢及百年至是始舉而行中外胥悅太子既立廟見還宮市肆民擁道喜躍曰少年天子也帝聞之不懌召寇準謂曰人心遽屬太子欲置我何

地準再拜賀曰此社稷之福也帝悟入語后嬪宮中皆前慶帝喜復出延準飲極醉而罷又曰太宗不豫宣

政使王繼恩忌太子英明陰與參知政事李昌齡知制誥胡旦等謀立楚王元佐帝崩皇后令繼恩召呂端端知有變即紿繼恩入書閣鎖閉之亟入宮后問曰宮車已晏駕立嗣以長順也今將如何端曰先帝立太子正為今日豈容更有異議后默然乃奉太子至福寧殿即位垂簾引見羣臣端平立殿下不拜請捲簾升殿審視

然後降階率羣臣拜焉 宋史曰仁宗在位三十五年
未有繼嗣嘉祐初暴得疾中外大小之臣無不寒心莫
敢先言范鎮獨奮曰天下事尚有大於此者乎即上章
言之不報凡見上面陳者三言益懇切鎮泣帝亦泣曰
朕知卿忠卿言是也當更俟三二年章十九上待命百
餘日鬚髮為白朝廷知不能奪乃罷知諫院改集賢殿
修撰鎮雖解言職無歲不申前議見帝春秋益高每因
事及之冀以動帝意至是因入謝首言陛下許臣今復

三年矣願早定大計又因裕享獻賦以諷 又曰包拯
權御史中丞奏曰東宮虛位日久天下以為憂陛下持
久不決何也仁宗曰卿欲誰立拯曰臣不才備位乞豫
建太子者為宗廟萬世計也陛下問臣欲誰立是疑臣
也臣年七十且無子非邀福者帝喜曰徐當議之 又
曰仁宗既連失三王自至和中得病不能御殿中外惴
恐臣下爭以立嗣固根本為言包拯范鎮尤激切積五
六歲依違未之行至是韓琦乘間進曰皇嗣者天下安

危之所係自昔禍亂之起皆由策不早定陛下春秋高
未有建立何不擇宗室之賢者以為宗廟社稷計帝曰
後宮將有就館者姑待之已又生女一日琦懷漢書孔
光傳以進曰成帝無嗣立弟之子彼中材之主猶能如
是況陛下乎願以太祖之心為心則無不可者又與曾
公亮張昇歐陽修極言之會司馬光呂誨皆有請琦進
讀二疏帝遽曰朕有意久矣誰可者琦惶恐對曰此非
臣輩所可議當出自聖擇帝曰宮中嘗養二子小者甚

純近不慧大者可也琦請其名帝以宗實告即英宗也琦等遂力贊之議乃定 經濟類編曰宗實天性篤孝

好讀書不為燕嬉褻慢服御儉素如儒者時居濮王喪乃起復知宗正寺琦曰事若行不可中止陛下斷自不疑乞內中批出帝意不欲宮人知曰只中書行足矣命下宗實固辭乞終喪帝復以問琦琦對曰陛下既知其賢而選之今不敢遽當蓋器識遠大所以為賢也願固起之及既終喪琦言宗正之命初出外人皆知必為皇

予不若遂正其名帝從之琦至中書召翰林學士王珪
草詔珪曰此大事也非面受旨不可明日請對曰海內
望此舉久矣果出自聖意乎帝曰朕意決矣王珪再拜
賀始退而草詔詔下宗實稱疾固辭章十餘上記室周
孟陽請其故宗實曰非敢徼福以避禍也孟陽曰今已
有此迹設固辭不受中人別有所奉遂得燕安無患乎
宗實始悟司馬光言於帝曰皇子辭不貲之富至於旬
月其賢於人遠矣然父召無諾君命召不俟駕願以臣

子大義責之宜必入帝從之宗實遂受命入宮 又曰

英宗久疾韓琦入問起居因進言曰陛下久不視朝願
早建儲以安社稷帝頷之琦請帝親筆指揮帝乃書曰
立大大王為皇太子琦曰必穎王也煩聖躬更親書之
帝又批於後曰穎王頊琦即召學士承旨張方平至福
寧殿草制帝憑几言言不可辨方平復進筆請書其名
帝力疾書之太子既立帝因泣然下淚文彥博退謂琦
曰見上顏色否人生至此雖父子亦不能不動也 宋

史曰元懿太子薨高宗未有後而昭慈聖獻皇后自江西還行在后嘗感異夢密為高宗言之高宗大寤會右僕射范宗尹造膝以請高宗曰太祖以神武定天下子孫不得享之遭時多艱零落可憫朕若不法仁宗為天下計何以慰在天之靈於是詔選太祖之後同知樞密院事李回曰藝祖不以大位私其子發於至誠陛下為天下遠慮合於藝祖可以昭格天命高宗曰此事不難行朕於伯宇行中選擇庶幾昭穆順序而上虞丞婁寅

亮亦上書言昌陵之後寂寥無聞僅同民庶藝祖在上
莫肯顧歆此金人所以未悔禍也望於伯字行內選太
祖諸孫有賢德者高宗讀之大感歎紹興二年選秦王
德芳五世孫左朝奉大夫子偁之子伯琮入宮至三十
年立為皇子三十二年立為皇太子改名昀受禪為孝
宗 經濟類編曰孝宗始以白布巾袍視事於延和殿
朔望詣德壽宮則袞經而杖如初詔太子參決庶務於
議事堂左諭德尤袤言於太子曰大權所在天下之所

爭趨甚可懼也願殿下事無大小一取上旨而後行情
無厚薄一付衆議而後定又曰儲副之位止於侍膳問
安不交外事撫軍監國自漢至今多出權宜事權不一
動有觸礙乞俟祔廟之後便行懇辭以彰殿下令德
又曰寧宗以國本未立命選太祖十世孫年十五以上
者教育宮中如高宗擇普安王故事初慶元人余天錫
為史彌遠家童子師性謹愿彌遠在相位以帝未有儲
嗣而沂靖惠王近屬亦未有後欲借沂王置後為名陰

擇宗室中可立者以備皇子之選會天錫告還鄉秋試
彌遠密語之曰今沂王無後宗子賢厚者幸具以來天
錫渡浙舟抵越西門會天大雨過全保長家避雨保長
知其為丞相容具雞黍甚肅須臾有二子侍立天錫異
而問之保長曰此吾外孫趙與莒與芮也日者嘗言二
兒後當極貴天錫因憶彌遠言及還臨安以告之彌遠
命召二子來保長大喜驚田治衣冠集姻黨送之且詫
其遇及見彌遠善相大奇之恐事泄不便遽使復歸保

長大慙逾年復召二子保長辭謝不遣彌遠乃使天錫
密諭保長遂載至臨安及貴和立為皇子更名竑補與
呂秉義即賜名貴誠後彌遠忌竑立貴誠為帝是為理
宗也 又曰理宗家教甚嚴太子雞初鳴問安再鳴回
宮三鳴往會議所參決庶事退入講堂講經史將晡復
至榻前問今日講何經答之是則賜坐賜茶否則為之
反覆剖析又不通則繼以怒明日須更覆講率為常例
遼史曰遼義宗名倍太祖長子幼聰敏好學外寬內

摯神冊元年立為皇太子時太祖問侍臣曰受命之君
當事天敬神有大功德者朕欲祀之何先皆以佛對太
祖曰佛非中國教倍曰孔子大聖萬世所尊宜先太祖
悅即建孔子廟詔皇太子春秋釋奠又曰太祖破輝
罕城改其國曰東丹名其城曰天福以倍為人皇王主
之仍賜天子冠服建元甘露稱制置四相及百官一用
漢法歲貢布十五萬端馬千匹上諭曰此地瀕海留汝
撫治以見朕愛民之心駕將還倍作歌以獻倍辭太祖

曰得汝治東土吾復何憂倍號泣而出 又曰後太祖

訃至倍即日奔赴山陵倍至皇太后意欲立德光乃謂
公卿曰大元帥功德及人神中外攸屬宜主社稷乃與
羣臣請於太后而讓位焉於是大元帥即位是為太宗
又曰太宗既立見疑以東平為南京徙倍居之盡遷
其民又置衛士陰伺動靜倍既歸國命王繼遠撰建南
京碑起書樓於西宮作樂田園詩唐明宗聞之遣人跨
海持書密召倍倍因畋海上使再至倍謂左右曰我以

天下讓主上今反見疑不如適他國以成吳泰伯之名

立木海上刻詩曰小山壓大山大山全無力羞見故鄉

人不如投他國攜高美人載書浮海而去唐明宗以天

子儀衛迎倍倍坐船殿衆官陪列至汴見明宗明宗以

莊宗后夏氏妻之拜懷化軍節度使鎮滑州至世宗即

位

世宗倍長子也

謚讓國皇帝重熙二十年增謚文獻欽義皇

帝廟號義宗終遼之代賢聖繼統皆其子孫也 又曰

章肅皇帝小字李胡太祖第三子少勇悍多力而性殘

酷太祖嘗觀諸子寢李胡縮項卧內曰是必在諸子下
又嘗大寒命諸子採薪太宗不擇而取最先至人皇王
取其乾者束而歸後至李胡取少而棄多既至袖手而
立太祖曰長巧而次成少不及矣而母篤愛之天顯五
年立為皇太弟及世宗即位鎮陽太后怒遣李胡將兵
擊之至泰德泉為所敗耶律烏哲入諫太后曰主上已
立宜許之李胡在側作色曰我在烏裕安得立烏哲曰
奈公酷暴失人心何太后曰昔我與太祖愛汝異於諸

子諺云偏憐之子不保業難得之婦不主家我非不欲
立汝汝自不能矣重熙末更諡章肅皇帝 金史曰國

初制度未立太宗熙宗皆自按班貝勒即帝位按班

貝勒者漢語云最尊官也熙宗立濟安為皇太子始

正名位定制度焉

濟安後諡英悼太子

經濟類編曰金世宗謂

太子曰朕為汝措天下當無復有經營之事汝惟無忘
祖宗純厚之風以勤修道德為孝明信賞罰為治而已
昔唐太宗謂高宗曰吾伐高麗不克終汝可繼之如此

之事朕不以遺汝唐太宗又嘗曰爾於李勣無恩今以
事出之我死宜即授以僕射彼必致死力矣君人者焉
用偽為受恩於父安有忘報於子者乎朕御臣下惟以
誠實耳 又曰元太子真金世祖之長子初封燕王守

中書令兼判樞密院事劉秉忠薦中山王恂以輔之世
祖以為太子贊善勅兩府大臣凡有啟稟必令恂與聞
恂言太子付托至重當延名德與之居處況兼領中書
樞密之政詔條所當遍覽庶務亦當屢省又以遼金之

事近接耳目者區別善惡上之 又曰真金初從姚樞

竇默學仁孝恭儉尤優禮大臣一時在師友之列者非
朝廷名德則布衣節行之士在中書日久明於聽斷聞
四方科徵輓漕造作和市有係民之休戚者多奏罷之
中外歸心焉江西行省以歲課羨鈔四十七萬貫來獻
太子怒曰朝廷但令汝等安百姓百姓安錢糧何患不
足百姓不安錢糧雖多能自奉乎盡却之中庶子布斯必
以其子阿巴齊入見諭之以母讀蒙古書須習漢人文

字行臺治書侍御史王暉進承華事略二十篇太子覽之至漢成帝不絕馳道唐肅宗改服絳紗為朱明服心甚喜曰我若遇是禮亦當如是又至邢峙止齊太子食邪蒿顧侍臣曰一菜之名遂能邪人邪詹事張九思曰正臣防微理固當然太子善其說令諸子傳觀其書時帝春秋高南臺御史上書請內禪太子聞之懼臺臣寢其章不敢聞而阿哈瑪特之黨塔奇呼阿薩爾等請收百司吏案鉤考天下錢穀欲因以發之都事尚文曰是欲上

危太子下陷大臣其謀姦矣遂語御史大夫及丞相先
入言之以奪其謀帝震怒曰汝等無罪耶丞相進曰臣
等無所逃罪但此輩名載刑書而為此舉實動搖人心
耳太子益憂懼不自安尋卒又曰皇子阿裕錫哩達
喇入端本堂肄業以李好文為諭德歸暘為贊善張冲
為文學命托克托領其事堂虛中座以俟臨幸皇子與師
傅分東西鄉坐授書其下僚屬以次列坐好文取經史
集有關治體者為書曰端本堂經史要義又取古史自

三皇迄今宋國祚久速治亂興廢為書曰大寶錄前代
帝王善惡當法戒者為書曰大寶龜鑑以進他日皇子
坐清寧殿分布長席列坐高麗西番僧曰李好文先生
教我儒書多年尚不曉其意今聽佛法一夜即曉由是
愈崇尚佛學 明紀事本末曰太祖即位之初中書及
都督府議倣元舊制設中書令欲奏以太子為之上曰
元人事不師古設官不以任賢惟類是與豈可取法且
吾子年齒未長更事未多所宜尊禮師傅博通今古他

日軍國重務皆令啟聞何必倣彼作中書令乎 又曰

太祖洪武元年禮部尚書陶凱請選人專任東宮官屬
上曰朕以廷臣有德望者兼東宮官非無謂也嘗慮廷
臣與東宮官屬有不相能遂成嫌隙江充之事可為明
鑒朕今立法令臺省等官兼東宮官贊輔之父子一體
君臣一心於是以李善長為太子少師兼詹事馮勝兼
副詹事楊憲傅瓛兼府丞徐達兼太子少傅常遇春兼
太子少保鄧愈湯和兼太子諭德章溢兼太子贊善大

夫劉基兼太子率更令上諭善長等曰朕於東宮不別設府僚而以卿等兼之者蓋軍旅未息朕若有事於外必留太子監國若設府僚卿等在內事當啟聞太子或聽斷不明卿等必謂府僚導之嫌疑由是而生朕所以特置賓客諭德等官以輔成太子德性且選名儒為之賓友又曰太祖建大本堂命取古今圖籍充其中延儒臣教授太子諸王以起居注魏觀侍太子說書又曰上問太子近儒臣講說經史何事對曰昨講漢書七

國叛漢事遂問此曲直誰在對曰曲在七國上曰此講官偏說耳景帝為太子時常投博局殺吳王世子及為帝又聽鼂錯之說黜削諸侯七國之變實由於此若為諸王講此則當言藩王必上尊天子下撫百姓為國家藩輔以無撓天下公法如此則為太子者知敦睦九族隆親親之恩為諸子者知夾輔王室盡君臣之義通紀曰太祖一日錄囚畢令御史袁凱送東宮覆審遞減之凱還復命上問朕與東宮孰是凱頓首曰陛下法之

正東宮心之慈上大喜悉從之 又曰成祖永樂二年
冊立世子高熾為皇太子命禮部尚書蹇義兵部尚書
金忠並兼詹事府詹事禮部尚書李至剛兼左春坊翰
林院學士解縉兼右春坊黃淮胡廣為左右庶子兼侍
讀胡儼楊榮為左右諭德兼侍講楊士奇金幼孜兼左
右中允初上議建儲武臣請立高煦謂其有扈從功金
忠以為不可上猶豫不定遂召解縉預議又密以問黃
淮皆言立嫡以長萬世正法上意遂決 弇山堂別集

曰文皇一日召解縉至便殿屏左右問曰漢王英武類
我太子不如也於汝意何如縉曰太子守成令主天下
之本豈可輕動文皇默然縉出泄其語為漢王所訴出
為交趾參議又三年請鑿章江水忤旨下獄久之竟以
舊憾忿死 明紀事本末曰成祖以文華寶鑑授太子
顧侍臣解縉等曰皇考嘗採經傳格言為儲君昭鑒錄
此書稍充廣之益以皇考聖謨大訓以為子孫萬世帝
王之法昔秦始皇教太子以法律晉元帝授太子以韓

非書帝王之道廢而不講所以亂亡朕此書皆大經大法卿等兼輔東宮當以此為說庶幾成其德業他日不失為守成令主 又曰上又諭黃淮楊士奇曰東宮侍側朕問今日講官說何書對曰論語君子小人和同章因問何以君子難進易退小人則易進難退對曰小人逞才而無恥君子守道而無欲又問曰何以小人之勢常勝對曰此係上人之好惡如明主在上必君子勝矣朕喜其學問有進卿等其盡心輔之 又曰成祖巡幸

北京敕皇太子監國惟文武除拜四裔朝貢邊境調發
上請行在餘常務不必啓聞仍命蹇義金忠黃淮楊士
奇輔導監國 又曰永樂十一年上幸北京親征瓦剌
明年六月班師太子遣金忠等齎表往迎八月帝至北
京以太子所遣使迎車駕緩且書奏失辭怒曰此輔導
者之咎也漢王高煦復譖之遂遣使逮蹇義黃淮楊士
奇楊溥芮善及司經局正字金問等至中途有旨宥蹇
義回南京黃淮先至北京下獄次日士奇及金問繼至

上曰楊士奇姑宥之朕未嘗識金問何以得侍東宮命
法司鞫之尋召士奇至問東宮事士奇叩頭稱太子孝
敬誠至凡所稽遲皆臣等之罪乃下士奇錦衣衛獄未
幾特宥復職時金問辭連溥等遂相繼下獄有白事者
曰殿下知讒人乎太子曰吾不知知為子耳 又曰太
子監國時兩京距隔數千里小人陰附漢府者讒搆百
端侍從監國之臣朝夕惴惴人不自保上遣禮部左侍
郎胡濙巡江浙諸郡陞辭上諭曰人言東宮多失可多

留數日試觀何如密奏來奏字須大晚至即欲觀也潑
至京師日隨朝凡見東宮所行之善退即記之勲臣某
者語不謹侍衛挺之仍當陞口奏有旨不問既退亟宣
侍衛者賞鈔若干錠於是羣臣皆言不顯責大臣而旌
禁衛所以寬有罪而愧其心見殿下之仁明也居稍久
楊士奇曰公命使也宜亟行潑權辭謝曰方治冬衣未
完爾至安慶始書奏以所見皆誠敬孝謹七事密疏以
聞上覽之大悅自是不復疑太子 通紀曰景帝欲易

太子恐文武大臣不從與太監王誠舒良謀先啖閣下
諸學士各賜金五十兩銀一百兩陳循輩惟知感惠遂
以太子為可易時廣西思明府知府黃瑠庶兄玠欲奪
嫡陰謀使人殺瑠罪發當死乃遣人赴京先賂用事者
上疏請易太子下禮部會多官議陳循等將覆奏署名
王直不得已亦署奏上遂改封皇太子見深為沂王而
立見濟為皇太子於是陞賞太濫有滿朝皆太保一部
兩尚書之謠又曰見濟遘疾殤殂鍾同手疏請朝南

宮復沂王為皇太子未上以示都御史劉廣衡止之以
諷禮部尚書胡濙濙縮不敢對曰作死作死同不聽竟
上之適章綸亦上疏陳修德弭災十四事其一謂宜朝
見於南宮以敦同氣之情以隆尊崇之禮復沂王於儲
宮以定天下之大本疏入已晡時帝覽畢大怒日已暝
宮門閉傳旨自門隙中出命錦衣衛即刻逮捕入獄拷
訊又二日并鍾同逮治日加拷掠流血被體逼令誣引
大臣并南宮通謀不伏復加炮烙之刑窮治慘酷濱死

卒無一語他及會天大風雨黃沙四塞乃密敕錦衣衛

緩其獄

又曰憲宗成化六年七月皇子生

即孝宗也

母紀

氏在御妻之列既有孕萬貴妃知而恚之百般苦楚胎竟不墮上令託病出居安樂堂以痞報而囑門官護視之至是皇子生母乳不足太監張敏使女侍以粉哺之至彌月西內廢后吳氏保抱惟謹不使貴妃知之又曰成化十一年五月手勅禮部朕皇子年已六歲未有名禮部會同翰林院擬奏先是悼恭太子薨禁中漸傳

西宮有一皇子上心甚念之然慮為萬貴妃所忌至是張敏厚結貴妃主宮太監段英乘間言之貴妃驚曰何不早令我知遂啟上即召見天性感通相持泣下動容出語矩度不凡上撫之大喜貴妃具服進賀召皇祖母紀氏厚賜之遂令內閣擬名不稱旨上親名之徙紀氏居西內永壽宮禮數視皇妃中外聞之大悅十一月立為皇太子 又曰成化二十一年三月泰山屢震壬午朔四鼓大震是夜復震丙戌四鼓復震甲午乙未相繼

震庚子連震二次有司奏聞時椒寢漸繁上頗有易樹
意而未宣露會欽天監奏言泰山震動應在東宮上大
驚意遂已

太子二

原樹嫡

立長

晉起居注曰武帝太始三年有司奏正統立嫡詔曰統承大業懼未能光祖宗

之遺德至於建嗣樹嫡非所務也盧植奏事曰王后無子擇立長親年均以德德均決之以卜筮所以承先

祖也幼海少微山海經曰無臯之山南望幼海郭璞注曰幼海即少海也荆州星占曰

少微星一名處士星儲君副主之官

黃離

蒼震

易曰黃離元吉注曰離南方之卦離為火

土託位焉土色黃火之子喻子有明德能附麗於其父之道順成其業故吉也又曰震為長子又曰震為蒼

筴

天序

國貞

漢書成帝詔曰定陶王欣慈仁孝順可以承天序繼祭祀執金吾任宏持

節徵欣為皇太子

儲貳

明兩

晉中興書曰安皇帝烈宗長子也冊為皇

下禮記詳類聚

太子曰岐嶷表于載誕克廣同乎大

守桃

主器

易曰

成是用命爾以登儲貳下詳類聚
震驚百里驚遠而懼邇也出可以守宗廟社稷以為祭
祀主禮記曰遠廟為桃易曰主器莫若長子故受之

以震

洊雷

重海

易曰洊雷震又曰震為長子崔豹古今注曰漢明帝為太子樂人作歌

詩四章以贊太子之盛德曰日重光月重輪星重輝海重潤

增吞日

流星

新書

曰漢景帝夢神女捧日以授王夫人夫人吞之十四月而生武帝帝王世紀曰修已見流星貫昴又吞神珠

而生

大禹

剪鬢

升榻

金史曰熙宗皇統二年生皇子濟安喜甚遣使馳報明德宮太皇太

后五日命名大赦天下來月剪鬢告天地宗廟宋史

曰真宗幼英姿睿表特異太祖愛之育於宮中嘗登萬

歲殿升御榻坐太祖大奇之撫而

問曰天子好作否對曰由天命耳

生日

樂懸

明紀事本

末曰景帝欲易儲語太監金英曰七月初三東宮生日

也英頓首對曰東宮生日是十一月初二日上默然

文獻通考曰古者太子生則太師吹管以度其聲觀所

協之律有虞典樂教胄子皆以樂為教則陳金石以重

元良冊拜宜倣古制由唐季世儲貳罕定國家亦多故

而禮廢樂缺至道始冊太子有司言宜奏正安之樂舉

行百年曠典中外胥悅至天禧冊

命禮儀院奏改正安為明安之樂

御名

御字

通紀曰明

憲宗命禮部會同翰林院擬進太子名不稱旨帝自名

之曰祐楹宋史曰高宗紹興三十二年立伯琮為皇

太子改名春命學士洪遵為太子擇字
遵擬四字以進不稱旨御筆賜字元永

侍觀選擇

唐書太宗每視朝皇太子常侍觀決庶政

合璧事類

曰宋紹興初詔知大宗正訪求太祖後伯字行七歲以

下者十人入宮備選十人中又擇二人一肥一瘠乃留

肥而遣瘠未出高宗忽云更仔細觀乃令二人叉手並

立忽一猫至前肥者以足蹴之上曰猫偶然而過何為

遽踢之輕易如此安能任重邪遂留瘠而遣肥者瘠即

孝宗肥者名伯浩

練歷

迎勞

宋史曰孝宗以恭王

後終於温州都監

子而以其非次遲之乾道六年虞允文為相因請早建

儲貳孝宗曰朕久有此意事亦素定但恐儲位既正人

性易驕即自縱逸不勤於學浸有失德朕所以未建者

欲其練歷庶務周知古今庶幾無後悔耳七年上兩宮

尊號禮成允文復以請孝宗曰朕既立太子即令親王

出鎮外藩卿宜討論前代典禮乃立光宗為皇太子

奔山堂別集曰明洪武二年征南將軍廖永忠副將軍朱亮祖等師自廣西還上遣皇太子率百官迎勞於龍灣

龍符

玉契

天中記曰唐六典傳符之制太子監國給雙龍之符左右各十左者進內

右者付外

唐書曰

長安中突厥使者入見皇太子應

朝有司移文東宮

召太子崔神慶諫曰五品以上佩龜

者蓋防徵召之詐內出龜以合之況太子乎古者召太

子用玉契此誠重慎防萌之意不可不察凡慮事於未

萌之前故長無悔吝之咎今太子與陛下異

宮非朝朔望而別喚者請降墨勅玉契詔可

針璫

擲倒

彙苑詳註曰晉愍懷太子舍人杜錫每規勸太子

太子怒使人以針著錫所坐璫中刺之

經濟類

編曰唐太子弘因宴集命宮人擲倒次至左奉裕率王

及善及善曰擲倒自有伶官臣若奉令恐非所以羽翼

殿下也太子謝之上

請過家

入民舍

唐書曰明皇

聞之賜及善縑百匹

為太子時嘗

游獵韋杜間怠休樹下王琚以儒服見且請過家太子
許之至其廬乃蕭然窶陋坐久殺牛進酒殊豐厚太子
異之自是每到韋杜輒止其廬明紀事本末曰仁宗
為太子赴召至北京過鄒縣見男女持筐路拾草實者
駐馬問所用民跪曰歲荒以為食太子惻然稍前下馬
入民舍視民皆衣百給竈釜傾仆歎曰民隱不上聞至
此乎顧中官賜之鈔時山東布政使石執中來迎責之
曰為民牧而民窮如此亦動念乎執中言凡被災之處
皆已奏乞停止今年秋稅矣太子曰民餓且死尚及徵
稅耶汝速發官粟賑之執中請人給三斗曰且與六斗
汝毋懼擅發倉廩吾見上自奏也及至京為上言之上
曰昔范仲淹子猶舉麥舟濟父之故舊况百姓吾之赤
子乎

寶慶曲

黃臺辭

唐高宗時章懷太子作寶慶曲
閱於太清觀李嗣真謂道人劉

綰輔儼曰宮不召商君臣乖也角與徵戾父子疑也死
聲多且哀國家無事太子任其咎俄而太子廢下見

前緣撞兒

漆室女

唐書曰唐文宗莊恪太子稍事燕豫不能一循法又母愛弛揚

賢妃方幸數譖之帝他日震怒欲廢之羣臣頓首諫御史中丞狄蕪暮流涕固爭意稍釋然太子終不能自白其讒而行已亦不加修也是年暴薨帝悔之明年置酒殿中有俳兒緣撞父畏其顛環走撞下帝感動謂左右曰朕有天下反不能全一兒乎乃誅平日毀短太子者事詞類奇曰魯漆室女倚柱而嘯隣婦謂之曰何嘯之悲也子欲嫁乎吾為子求偶女曰吾豈嫁哉吾憂魯君老而太子少也已上總載太子事

原瑤

山伊水

山海經曰西海之外有瑤山其上有人名曰太子長琴顓頊生老童老童生祝融祝融生

長琴

列仙傳曰王子晉吹笙作鳳鳴

桂宮

蘭殿

伊洛之間有道士浮丘伯接以至嵩山

漢書曰孝成皇帝元帝太子也初居桂宮漢武故事曰武帝生猗蘭殿四歲立為膠東王七歲立為皇太子

青宮 玄圃

東方朔神異經曰東方東明山有宮青石為牆面一門門有銀榜以青石碧鏤

題云天地長男之宮

潘尼詩序七

龍樓 雞戟

上詳

月七日皇太子會於玄圃有令賦詩

類聚 張敞晉東宮舊事

博望

宣猷

漢書曰衛皇后生戾太子

曰崇福門雞鳴戟十張

據上立博望苑使通賓客

潘尼皇太子集詩曰置

酒宣猷庭擊鐘靈沼濱霑恩洽明兩遭德會陽春

西池

東閣

徐爰釋問注曰西明內有太子池孫權子和所穿有土山臺晉帝在儲宮所築故俗

呼太子池或曰西池

魏文帝集曰為太子時北園及東閣講堂並賦詩命王粲劉楨阮瑤應瑒等同作

崇賢 求福

陸士衡詩曰在昔蒙嘉運矯迹入崇賢假翼鳴鳳條濯足升龍泉張敞東宮舊事

曰中庶子四人局帷侍中若皇太子入宮與中書舍人各一人更日直求福坊

銀榜

銅扉

上詳青宮注 漢書曰元帝召太子出龍樓門

增東

宮

少陽

卞壺議曰太子所居宮稱東宮不言太子宮者二宮以東西為稱明是天子之離宮使太

子居之也

天中記曰魏收按東宮舊事太子宴會以西面為禮 翰苑新書曰梁簡文上昭明太子表正少

陽之位主承祧之則 唐書曰

東朝

東儲

天中記

武后撰少陽政範賜太子賢

詩昔余與子繾綣東朝 顏延年詩帝體麗明儀宸作

貳君彼東朝金昭玉粹

齊文惠太子詩正位東儲善

立名尚 又正體

韻林曰中宸天地交

東儲方樹年德

儀宸

承華

會之際儀宸太子居

也 事詞類奇曰漢宮

香殿

別院

元史曰太子真

殿名云太子門曰承華 工請鑿石為池如曲水流觴故事太子曰古有肉林酒

池爾欲吾效之耶不許

唐書曰太宗嘗命太子治遊

御定淵鑑類函

觀習射太子辭以非所好願奉至尊居膝下
太宗大喜乃營寢殿側為別院使太子居之

玄圃池

樂賢堂

事詞類奇曰梁昭明太子好士愛文築立亭
館與朝士諸賢泛舟玄圃池番禺侯軌盛稱

此中宜奏女樂太子不答詠左思招隱詩曰何必絲與
竹山水有清音軌大慙天中記曰劉孝綽掌東宮管
記與陳郡殷芸吳郡陸倕琅琊王筠彭城到洽等皆
為昭明賓禮太子起樂賢堂乃使畫工先圖孝綽

旬日一還

不令居外

山堂肆考曰唐太宗貞觀中疾
未全平詔太子間日聽政於金

液門既罷則入侍藥膳不離左右褚遂良請遣太子旬
日一還東宮與師傅講論從之宋史曰孝宗時寧宗

當出閣兩宮愛之不欲令居外乃建
第東宮之側遷焉已上太子居處

原赤旄 黃麾

張敞晉東宮舊事曰皇太子初拜有
赤旄幢又曰皇太子鹵簿有黃麾

鸞旌

象輅

徐廣

東宮頌曰禮樂承軒典冊授庭命服唯九龍旗鸞

花

旌沈約宋書曰太始三年制太子安車乘象輅

枕

畫幡

張敞晉東宮舊事曰皇太子有大漆枕銀花環鈕自副續漢書曰皇太子安車朱輪青

蓋畫幡文

銅羊

金馬

張敞東宮舊事曰皇太子有銅水羊一枚管自副吳志

輦五彩

曰孫登字子高權長子魏黃初二年立為太子嘗

建

失盛水金馬孟覺得其主左右所為不忍致罰

九旗

舞六佾

張敞晉東宮舊事曰皇太子初拜有石山安車一建九旗青色四馬又曰皇

太子大小會庭設

丹霞刀

彩虹劍

魏文帝典論曰維建安二十四

三廂樂舞六佾

年二月丙午魏太子丕造刀三其二曰含章彩

增元

似丹霞

又曰造百辟寶劍三其二曰流彩虹

服

執圭

唐書曰太子弘受春秋左氏於率更令郭瑜至楚世子商臣弑其君喟而廢卷曰所不忍

聞願讀他書乃改受禮及加元服命賓客許敬宗右庶
子許圜師中書侍郎上官儀中書舍人楊思儉即文思
殿摘采古今文章號搖山玉彩凡五百篇宋史曰太
宗至道元年詔立皇太子令有司草具冊禮有司言前
代無太子執圭之文按周禮公執桓圭公即三恪之後
乃上公也晉制太子出會在三恪之下三公之上請如
王公之制執

玉冊

金輅

宋冊太子冊用珉玉如乘
輿之制而差損降元史

曰世祖至元十年立真金為皇太子受玉冊詔曰仰惟
太祖皇帝遺訓嫡子中有克嗣服繼統者預選定之是
用立太宗英文皇帝以紹隆丕構自時厥後為不顯立
冢嫡遂啟爭端朕上遵祖宗弘規下協昆弟僉同之議
立爾為皇太子此者儒臣敷奏國家定立儲嗣宜有冊
命此典禮也今遣攝太尉左丞相伯顏持節授爾玉冊
金寶宋史曰孝宗乾道元年制立鄧王惲為皇太子
禮官言皇太子朝謁太廟別廟當袞冕乘金輅設仗從

之皇太子言乘輅設仗雖有至道天禧故事非臣子所安詔免

賜印

夢寶

明太祖賜懿文

太子玉印文曰大本堂記成祖賜太子玉押曰人主中正及仁宗即位時宣宗方為皇太孫復舉以賜之續

文獻通考曰建文帝在儲位嘗

青蓋車

朱明服

後漢

夢神人致上帝命授以重寶

輿服志皇子錫青蓋車

山堂肆考曰唐明皇立忠王

璿為太子將受冊命儀注有中嚴外辦絳紗袍太子曰

此天子禮也乃下公卿議太師蕭嵩左丞相裴耀卿請

改外辦為外備絳紗袍為朱明服乃從之已上太子

章服原夏啟周誦史記曰夏禹東巡狩至於會稽而

啟賢天下屬意焉諸侯皆去益而歸啟曰吾君帝

禹之子又曰周武王崩太子誦代立是為成王周

發漢莊尚書中候曰文王廢伯邑考立發為太子曰

脩我度遵德紀後恒稱太子發後漢書曰

孝明皇帝諱莊光武第四子生而豐下十歲能通春秋十九年立為皇太子師事博士桓榮學尚書

魏

丕 晉紹

魏志曰文帝諱丕武帝太子也建安十六年為五官中郎將二十二年立為魏太子丕貞

固敏能鎮定大事

何法盛晉中興書曰明帝諱紹

字道畿中宗踐阼尊號為皇太子東宮敬禮賢士昵近

明德 增子啟最長 雉奴仁懦 合璧事類曰漢文帝時

今縱不能博求賢聖有德之人而禪焉而曰豫建太子是重吾不德也有司固請曰子啟最長請建之以為太

子乃許之

宮使

押班

五代史曰後唐莊宗時豆盧革為相建言唐故事皇子皆

下見前

為宮使因以鄴宮為興聖宮以太子繼岌為使 真宗

天禧五年制依漢唐故事五日一朝遇慶會皇太子

押班 開封尹 中書令 宋史曰宋以太子為開封尹 元史曰元制以太子領中書令

兼樞密院事

原四術

三善

禮記曰樂正崇四術立四教順先王詩書禮樂

已上太子位

以造士王太子王子羣后之太子卿大夫元士之嫡子國之後選皆造焉

下詳類聚

玉裕

金聲

陸士衡侍皇太子宣猷堂詩曰茂德川沈天姿玉裕潘凡皇太子釋奠頌曰尊道讓齒降心下問

響以金聲

五稱

三至

周語曰靈王太子幼而聰明晉平公使叔譽於周見太子

光以玉潤

晉與之言五稱而

漢幄

周寢

並詳類聚

寢門

馳道

三窮

下詳類聚

並詳

嘗藥

省膳

禮記曰太子朝夕至於寢門外問內豎言有疾則太子親齊玄冠而

類聚

勸膳宰之饌必敬視之疾之藥必親嘗之儀曰皇太子五日一至臺因坐東廂省視膳食

齒胃

問豎

禮記曰世子齒於學國人觀之曰將君我而與我齒讓何也曰有父在則禮然又曰凡入學以

齒下

詳類聚

春誦夏絃

撫軍監國

禮記曰凡學世子學士以時春誦夏絃太

師詔之

左傳曰晉侯使太子申生伐東山臯落氏里

克諫曰太子奉冢祀社稷之粢盛以朝夕視君膳者也

故曰冢子君行則守有守則從

增推讓

不凡

宋故事太

從曰撫軍守曰監國古之制也

子殿廬幄次班在宰相上官僚稱臣真宗為太子皆推

讓不受宋史曰史彌遠以鄭清之兼魏忠憲王府教

授使教宗室子昀清之日教昀為文又購高宗書俾習

焉清之謁彌遠即以昀詩文翰墨示之譽之不容口彌

遠又問清之吾聞其賢已熟大要竟何如清之曰其人

之賢更僕不能數然一言以斷之曰不凡彌遠領之

藏書

善畫

遼史曰太子倍初市書至萬卷藏於鑿
巫間絕頂之望海堂又曰太子通陰

陽知音律精醫藥砭炳之術工遼漢文章嘗課陰符經
善畫本國人物如射騎獵騎雪騎千鹿圖皆入宋秘府

清內難

為元帥

明皇為臨淄郡王率萬騎兵入北軍討亂誅韋氏睿宗即位肅宗

討賊代宗常從於兵間至德二載以廣平郡王為天下兵馬元帥率朔方回紇等兵克復兩京德宗為太子

為天下兵

闕門步

肩輿入

唐書曰廣平王為元帥出師百官送於朝堂過

馬元帥

闕而下步出木馬門然後復騎經濟類編曰宋仁宗以宗實為太子宗實受命將入宮戒其舍人曰謹守吾舍上有適嗣吾歸矣因肩輿赴召良賤不滿三十人行李蕭然惟書數厨而已五日一開資

善堂

一月再至中書省

宋史曰仁宗大中祥符八年封壽春郡王天禧元年兼中

書令明年進封昇王九月冊為皇太子四年詔五日一開資善堂太子秉笏南鄉立聽輔臣叅決諸司事元

史曰世祖嫡子真金中統三年封燕王守中書令四年兼判樞密院事至元初省臣奏請王署勅每月必再至

中書

減依字

測甌名

合璧事類曰唐穆宗為太子

韋綬入侍讀太子書依字輒

去人曰上以此可天下事烏得全書邪綬白之帝喜賜

綬錦綵事詞類奇曰明皇命相皆先書其名一日書

崔琳等名覆以金甌會太子入帝謂曰此宰相名意之

誰乎中且賜酒太子曰非崔琳盧從愿乎帝曰然賜太

子

酒

誦詩無荒

寫經祈福

唐書曰順宗為太子侍宴

為擢歌衆樂間發德宗歡甚顧太子曰今日何如太子

誦詩好樂無荒以對宋史曰神宗寢疾宰相王珪乞

早建儲又請皇太后權同聽政神宗首肯三月朔皇太

后垂簾於福寧殿諭珪等曰皇子性莊重從學穎悟自

皇帝服藥手寫佛經為帝祈福因出

以示珪等所書字端謹珪等稱賀

母持大心

知

有聖德

元史曰太子真金受命巡海至冬還京間謂諸

王札拉固及從官伯顏等曰吾屬適有茲暇宜

各悉乃心慎言所守俾吾聞之於是色勃斂曰太祖有訓欲治身先治心欲責人先責己已延曰皇上有訓欺罔盜竊人之至惡一為欺罔後雖出善言人終弗信一為盜竊則事雖未覺心常惴惴札拉固曰我祖有訓長者抄深者底盖言貴有始終長必極其抄深必究其底不可中輟也太子曰皇上有訓毋持大心大心一持事即隳壞吾觀孔子之語即與聖訓有合也至王恂陳說尤多宋史曰英宗既為皇子慎靜恭默無所猷為而天下陰知其有聖德

被服如儒生

沿途問民瘼

明紀事本末曰仁宗為太

子監國視朝之暇手不釋卷被服寬博如儒生永樂十八年北京宮殿成命夏原吉召太子太孫於京師太子過鳳陽謁祭皇陵周步陵傍顧張本楊士奇曰國家帝業所自也徘徊久之耆老進謁從容與語賜勞優厚手書付原吉與士奇訪沿途軍民利病政事得失備顧問

東宮二十年 監國二

十年

唐書曰韓愈言順宗在東宮二十年天下陰受其賜不幸疾病享國日淺通紀曰明仁宗見星變

明日早朝罷召蹇義及楊士奇謂曰監國二十年為讒慝所構心之艱苦吾三人共之賴皇考仁明得遂保全

言已泣然義士奇亦淚

原問杜

禮荀

晉中興書曰杜夷字行齊

涕已上太子才德

為儒林祭酒皇太子凡三至夷舍執經問義魏志曰

文帝在東宮太祖謂曰荀公達人之師表汝當盡禮敬

之攸曾病太子問

鄭書

劉易

漢書曰初元中立皇太子博士鄭寬以尚

病獨拜於牀下

書授太子

續漢書曰劉昆少學

卞賦

溫箴

卞蘭讚太

施氏易明帝為太子以易入授

子賦曰竊見所作典論及諸賦頌沈思泉涌華藻雲浮

聽之忘味奉讀無倦

晉中興書曰溫嶠拜太子中庶

子數規諫諷議又獻

二疏

四皓

漢書曰地節三年立皇太子疏廣為

侍臣箴甚有補益

太傅兄子受為少傅父子並為師傅朝廷以為榮在位
五歲上疏乞骸骨上許之大夫故人祖道東都門外道
路觀者曰賢哉二大

夫也

下詳類聚

四友

六傅

上詳類聚 晉公卿禮秩曰愍懷立

東宮乃置六傅省尚書事始置詹事丞
文書關由六傅公以聞時號太子六友

師友

賓客

漢書曰疏廣字仲翁為太子太傅太子外祖父平恩侯
許伯以太子幼使其弟舜監護太子家上問廣廣曰太
子國儲副副君師友必求天下英俊不宜獨親外家
西京雜記曰文帝為太子立思賢苑以招賓客也

端士正人

司過徹膳

大戴禮曰昔周成王幼在襁褓之中選天下孝悌博聞有道術

者以輔翼之使與太子居處出入故太子目見正事耳
聞正言左右前後皆正人也又曰太子既冠成人免
於保傅之嚴則有司過之史徹膳之宰

增迎門

拜

傳

唐書曰晉王治為皇太子蕭瑀拜太子太保同中書門下三品帝曰三師以德導太子者也禮不尊則無

所取法乃詔師入謁太子出門迎拜師答拜每門讓乃

入師坐然後坐宋史曰真宗初正儲位李至與李沆

並兼賓客詔太子事以師傅禮真宗每見必先拜神

宗與岐嘉二王讀書東宮侍讀王陶講論經史輒相率

拜之游習謙沖山堂肆考曰元稹書成王始為太子

康叔與游目不闕淫艷耳不聞嬉笑居不近庸邪及為

君也血氣既定游習既成雖有放心不能奪已成之性

宋史曰李至等上表辭太子拜禮太宗詔答曰朕旁

稽古訓肇建承華用選端良資於輔導藉卿宿望委以

護調蓋將勗以謙沖故乃異其禮

數勿飾當仁之讓副予知子之心哲王師名儒傳

唐太宗作帝範以賜太子又曰汝當更求古哲王以為

師詳上翰苑新書曰後漢班彪上言皇太子官屬宜

師詳上翰苑新書曰後漢班彪上言皇太子官屬宜

博選名儒有威重明
通政事者以為太傅

不在學書

隨事規正

宋史曰仁宗為

太子時太子諭德見王旦稱太子學書有法旦曰諭德之職止於是邪張士遜又稱太子書旦曰太子不應舉

選舉士不在學書

元史曰贊善王恂卒太子嗟悼厚賻贈之顧謂左右曰王贊善當言必言未嘗顧惜隨事

規正良多裨補

今鮮有其匹也

講官非正不陳

經幄日侍不出

明紀

事本末曰侍講學士王達進講乾九四爻舉儲貳為說

太子召楊士奇問曰經旨於此恐無儲貳之說達不

譏否士奇曰講官非正不陳此本宋人胡瑗之說也太

子曰然則常人得此爻亦舉此說邪士奇曰殿下此問

甚善因舉程子云凡卦六爻人人有用聖賢有聖賢用

衆人有衆人用君有君用臣有臣用無所不通太子悅

元真金太子時侍經幄者如

喚醒此心心猶印

王恂白棟皆朝夕不出東宮

版元史曰諭德李謙夾谷之奇嘗進言於真金曰殿下
睿性夙成閱理久熟方遵聖訓參決庶務如視膳問
安之禮固無待於贊諭獨有澄原固本保守成業殿
所當留心敬陳十事而以正心為要曰太子之心天下
之本也太子心正則天心有所屬人心有所繫矣唐太
宗嘗言人主一心攻之者衆或以勇力或以辨口或以
諂諛或以奸詐或以嗜欲輻輳攻之各求自售人主少
懈而受其一則其害有不可勝言者殿下須嘗喚醒此
心不使為物欲所撓則固本澄原莫此為切經濟類
編曰太子嘗問王恂以心之所守恂曰嘗聞許衡言人
心猶印版然版本不差雖摹千萬本皆不差
本既差矣摹之於紙無不差者太子曰善

致書稱

名惶恐

齋書贊善先生

唐書曰唐制太子致書三師
必前後著名稱惶恐明紀

事本末曰仁宗在東宮嘗手書與贊善徐善述言覽卿
為予改詩甚善但今卿年邁輔子為勞似卿朴直苦口

者百無一二面諛順顏者比比有之卿無憚勞弼子成
業惟望金石之言日甚一日毋犯鱗觸諱之慮予今欲
學作表御可一如詩題立例具詩題與表題同日封進
以廣琢磨春暖順時將息以慰予懷書函曰皇太子齋
書贊善好古先生好古者善
述字也已上太子輔翼

太子三

原成業

漢書曰太子成萬世之業

繼體之慶

長男

東朝乾之長男

元子

成王顧命敬保元子

鳳笙

太子晉吹鳳笙於洛濱

鶴禁

漢宮闕疏曰白鶴太子所居之

地凡人不得輒入故云鶴禁也

作樂

山海經曰祝融生太子長琴是時處瑤山作瑤山之樂也

吹銅

大戴禮曰古者生太子太師吹銅而御戶注銅律也吹之以和氣

抗法

成王幼而不能

莅祚周公抗世子之法於伯禽使與王居欲令成王知父子君臣長幼之道

喜頌

漢太子喜王褒

甘泉及洞簫頌太子令左右皆誦之也

七鬯

易曰震驚百里不喪七鬯

弧矢

桑弧蓬矢

六以射天

好儒術

後漢章帝立為太子寬容好儒術顯宗器重之

拜太傅

晉賀循字彥先世為儒宗除太子太傅命皇太子親往拜之

教以禮

禮凡三王教世子必以禮

樂樂所以脩內也禮所以修外也禮樂交錯於中發形於外

諭諸德

師也者教之以事而諭諸

德也

太子出會

晉太子出會在三恪下王公上也

羣臣見儀

晉尚書符問王

公以下見太子儀及所衣服國子博士車穎議朝臣宜朱襹幘拜則案經傳不見其文故太傅羊祐慶太子稱叩頭死罪此則拜之證也又太寧三年詔議其典尚書卜壺謂宜稽則漢魏闔朝同拜其朱衣冠冕唯施天朝

宜構幘而已
朝議多同

輔翼歸道

保也者慎其身以輔翼之而歸諸道也

監撫

餘閒

文選序

作禱祝

漢書曰武帝年二十九乃得太子甚喜為立禱使東方朔枚臯作禱

祝

生甲觀

漢書成帝紀曰帝生甲觀畫堂顏師古注曰甲者甲乙丙丁之次也元后傳言見於

丙殿此其例也而應氏以為在宮之甲地謬矣畫堂但畫飾耳北堂書鈔

揺本

漢高欲廢太子叔孫

通曰太子天下之本一揺而天下不安奈何以天下為戲

亂本

傳嬖子配嫡亂之本也

不安

七發曰楚太子有疾吳客往問之曰伏聞太子玉體不安亦少間乎

不樂

漢太子體不安

忽忽不樂詔使王褒等皆之太子宮娛侍太子朝夕平復乃歸

思子之宮

歸來之

臺

白帖漢戾太子死後武帝思之作思子之宮歸來望思之臺欲其魂歸也

太子君之貳

太子國之棟

國語

記過之史

徹膳之宰

大戴記

太

師持銅

太宰持升

大戴禮青史記曰古者胎教王后腹之七月而就宴室太師持銅而

御戶左太宰持升而御戶右

升西階

見南郊

漢書

命膳宰

報

至尊

語林

春夏學干戈

秋冬學羽籥

妙思六經

逍遙百氏

魏志

潛思書籍

魏志

遊談莊老

王隱晉書

安車

班論

漢書

輿輪徐動

娛侍朝夕

入侍諷誦

兼資

敏達

東觀

先習教訓

魏文

義德允休

聽亮雄斷

世紀

一日之長

魏文帝

聽允之德

薛瑩漢書

恭敬而溫文

教

喻而德成

並禮記

行不正履

不脫冠帶

過闕則下

過廟則趨

漢書

天地降祥儲君應祉

太子仁孝天下

皆聞

太子名號繫於百姓

並漢書

從者文學託乘後

車

魏文

文帝得立喜抱辛毗

世語初文帝與陳思王爭為太子既而文帝得立抱

辛毗頸而喜曰辛君知我喜否毗以告女憲英憲英歎曰太子代君主宗廟社稷者也代君不可以不戚主國

不可以不懼宜戚而喜何以能久

慶由一人萬國作喜

曹植

寬惇謹

慎文詞博敏

漢書北堂書鈔

增至孝自天性與道合

聰敏

慧悟機思若流

沉毅好斷理詣自幽

疾諛亮物雅

悅直言 好學愛賢不恥下問 英姿邁古藝業超時

虛襟恭讓尊師重道 輕財好施勤恤民隱

慕容儁司徒左

長史李績言太

子大德有八

選重師保慎簡宮僚 定齒胄講業

之儀行問道嚴師之禮

唐元稹論教本

帶刀一枚 蒞醬一

合隋文帝戒太子曰吾昔日衣服各留一物時復觀之以自儆戒今賜汝以吾舊帶刀一枚并蒞醬一合汝

昔作上士時

道契生知

梁昭明太子

名高盛古

經濟類編曰唐

常所食也

元稹言太宗之在藩邸以至為太子也選知道德者十

八人與之游習不三四年而名高盛古豈一日二日而

致是乎游習之漸也

原位尊儲副

德茂元良 合符雷之象

海雷
震也

居明兩之位

出龍樓而問詔

入虎闈而齒

胄游海雷之講肆

齒明離之胄筵

繼正體以為

大本毓明德而居少陽

白帖

立太傅少傅以養之

觀德行而審喻之

選端士以衛翼之

爵以王嗣

漢書

昧爽而朝

韋昭並北堂書鈔

增國之上嗣古者元良

文

昌著於前星鉅龜由於守器

周王褒箴

蒼震發前星之輝

黃離表重輪之瑞

劉禹錫箋

絢氣逸於風雲好詞光於日

月

辨正論並天中記

原詩梁劉孝威重光詩曰重光儲后宣制義也赫赫重
光明明二聖帝作儲述禮和樂正中衢置尊高堂懸鏡
其酌不窮其明逾盛德音孔昭民胥攸詠明明二聖赫
赫重光風神灑落容止汪洋瞻彼談扇載抑載揚何斯
天辯如珪如璋顏閔函席游夏升堂以卿以士惟公惟
王思媚儲后顧哉樂康芄芃黍苗陰雨膏之詵詵纓冕
儲王道之道之以禮齊之以仁理則探聖言則窮神訓
于四國覃于萬民 又奉和簡文帝太子詩曰太子天

下本元良萬國貞周朝推上嗣漢世紀重明前星涵瑞
采潯雷揚遠聲三善傳樂正百行紀司成九流通已辨
七經咸所精博聞強子政高才凌長卿禮尊逾屈已德
盛益卑情仙氣貽鍾相儒道推桓榮延賢博望苑視膳
長安城園綺隨金輅浮丘侍玉笙智囊前斂笏端士後
垂纓九仙良所重四海更東傾班輸同策乘甲觀齊蓬
瀛陳徐陵同江詹事登宮城南樓詩曰元良屬上德
率土被中孚漢幄朝無怠周門夕復趨桓經既受業賀

拜且尊儒壯志諧風雅高文會斗樞鏗鏘叶舞蹈照爛
等琨瑜河水慙雄伯漳川仰大巫鮑魚寧入俎釣鼈匪
充厨叔譽恒詞屈防年豈濫誅 隋江總宴樂脩堂應

令詩曰肅城通甲觀承華啟畫堂北宮降恩賞西園度
羽觴殊私奉玉裕終宴在金房庭暉連樹彩簷影接雲
光仙如伊水駕樂似洞庭張彈絲命琴瑟吹竹動笙簧
庸疎濫應阮衰朽忝連章 唐虞世南追從鑾輿夕頓
戲下詩曰重輪依紫極前曜奉丹霄天經戀宸扆帝命

扈仙鑣乘星開鶴禁帶月下虹橋銀書含曉色金輅轉
晨飈霧澈軒營近塵暗斗城遙蓮花分秀萼竹箭下驚
潮撫已慙熊幹承恩集鳳條瑤山盛風樂抽簡薦徒謠
褚亮奉和禁苑餞別應令詩曰大蕃初錫瑞出牧邇
皇京暫以綠車重言承朱邱榮舒桃臨遠騎垂柳映軍
營惠化宣千里威風動百城禁籞芳嘉節神祿餞送情
金輅催別景玉管切離聲野花開更落山鳥弄還驚微
臣夙多幸薄官奉儲明釣臺慙作賦伊水濫聞笙懷德

良知久酬恩識命輕 韓王元嘉奉和周太子監守遼

戀詩曰乾象開層構離明啟少陽卜征從獻吉守器屬

元良逝矣凌周誦遙哉掩漢莊好士傾南洛多才盛北

場地分丹鷺嶺途間白雲鄉儲誠虔曉夕宸愛積炎涼

珠壁連霄漢萬物仰重光 薛元超和周太子監守遼

戀詩曰儲禁銅扉啟宸行玉輶遙空懷壽街吏尚隔寢

門朝地首瞻龍戟塵外想鸞鑣飛文映仙榜瀝思叶神

颺帝念紆蒼陸乾文煥紫霄歸塘橫筆海平圃振詞條

欲應重輪曲鏘洋韻九韶 增宋楊萬里壽皇太子詩
曰地出雷初震天昇日更重高飛千里鶴潛躍九淵龍
隆準如高帝虬鬚似太宗八荒陰賜裏戶戶是堯封

又曰重九吹花節千齡夢日時東朝分菊水南內賜茱
枝禹酒無多酌堯尊更一卮三宮千萬壽剝費若干詩

又曰繼照姿天縱分陰學日勤橘中招綺夏瓜處屏
伾文老別漁竿月來依鶴禁雲還將古為鑑聊寓野人
芹 趙彥端壽皇太子詩曰日日龍樓問寢時雞人未

動漏花遲前星一點朝天節只有青臺太史知 又曰
子晉吹笙未是仙阿丕橫槊少全篇小吟青着梅梢句
一日東風四海傳

原賦魏卞蘭贊述太子賦曰超古人之遐迹崇先聖之
弘基耽八素之秘奧遵二儀於大猷正往昔之常弊定
當世之舊儀稟休和之上性應五百之運期著典憲之
高論作叙懽之麗詩越文章之常檢揚不學之妙辭蹈
布衣之所難闡善道而廣之道無深而不測術無細而

不數論古賢以歎息觀懿德以歡娛歷精思於訓籍忽
日移而忘劬雖明略而無上猶博納以自扶賓故老以
勸俗諷六經以崇儒嘉通人之達節笑俗士之守株匿
天威之嚴厲揚愷悌之和舒惟凡百之詠德感恩惠之
有餘信清風之休著非臣下之敢虛乃作頌曰明明太
子既叡且聰博聞強記聖思無雙倚之左右如虎如龍
八俊在側旁無諛凶富不忘施尊而益恭研精書籍留
思異同建計立議廓然發蒙天下延頸歌頌德音聞之

於古見之於今深不可測高不可尋創法萬載乘此休
風又夏侯玄皇穎賦曰覽二儀之上禮本人倫之大
紀道莫隆於后辟統莫泰於宗祀伊皇衢之光赫享乾
祇之元祉在太和之五載肇皇穎之盛始時維孟秋和
氣淑清良辰既啟皇子誕生爾乃發愷悌之明詔振隆
恩之豐沛殊惠洽乎黎民崇施暢於無外爵羣兆以布
德赦殊死以崇仁黔首詠而齊樂願皇祚之日新

原頌魏曹植皇太子頌曰於我聖后憲章前志克纂二

皇三靈昭事祇肅郊廟明德敬惠陽和積吉鍾天之釐
嘉月令辰篤生聖嗣慶由一人萬國作喜喁喁萬國爰
爰羣生稟命我后綏之則榮長為臣妾終天之經仁聖
奕世永載明明同年上帝休祥淑禎藩臣作頌光流德
聲吁嗟卿士祇承予聽

原諫晉陸機愍懷太子誄曰明明皇子成命既駿保乂
皇家載生淑穎茂德克廣仁姿朗俊當克無疆光紹有
晉如何不弔暴離咎艱曾是遺愍匪降自天肇傾運祚

遂喪華年嗚呼哀哉沈雲既祛日月增暉靈寵可贈寃
魂難追舊物東返靈柩西歸傷我惠后寂焉翳滅銜哀
駿奔凶服就列追慕徽塵興言斷絕敢誅遺風庶有芳
烈其辭曰巍巍皇基奕奕紫微有命既集天祿永綏篤
生太子纂德承茂平紹大烈時惟洪胄竒穎發翹清藻
在秀誕自幼蒙逮事武皇展矣太子播此瓊芳允矣聖
祖無言不臧婉孌乘輿名裕德昌龍集庚戌日月改度
赫赫明明我皇登祚厥登伊何皇統是荷華紱重采翠

蓋垂葩鸞旗阿那玉衡吐和聿來在宮體亮而誠肅雍
皇極思媚紫庭亦既涉學遵師盛道何年之妙而察之
早謹言必復垂義則考惟天有命太子膺之惟皇有慶
太子承之當究遐年登茲胡考緝熙有晉克構帝宇如
何晨牝穢我朝聽仰索皇家惟塵明聖惴惴太子終溫
且敬銜辭即罪掩淚祇命顯加放流潛肆鴆毒痛矣太
子乃離斯酷謂天蓋高訴哀靡告鞠躬引分顧景摧剝
嗚呼哀哉凡民之喪有戚有姻太子之歿傍無昵親跼

踏嚴宮絕命禁闈幽柩偏寄孤魂曷歸嗚呼太子生冤
歿悲匹夫有怨尚或殞霜矧乃太子萬邦攸望普天扼
腕率土懷傷精感六沴咎徵紫房爰茲元輔啟我令圖
王赫斯怒天誅靡逋欃槍叱掃元凶服辜仁詔引咎哀
策東祖光復寵祚紹建藐孤於時暉服粲焉畢陳庭旅
舊物堂有故臣孰云太子不見其人嗚呼哀哉既濟洛
川靈旆左迴三軍悽裂都邑如隕慨矣寤歎念我愍懷
原哀策齊王融皇太子哀策文曰繡幕啟塗銅池從殯

葆鐸既行枚縉且引皇帝痛染盛之闕奉哀七鬯之有
亡憫含嗟乎崇正顧掩歎於承光式睠元良永懷人寶
俾茲史策載餘風道其辭曰居辰北極在日重離誕惟
妙善克自生知資神為契合聖如規地惟缺位月紀讐
期哀纏晦朔燧改歲時饘粥不溢薑桂無滋俛終心禮
昌我帝基思皇下武纘戎上德將叶人神永貽家國用
稽嗣典實弘儲則庸器改物徽號崇名往辭綠蓋來馭
朱纓旂旗旒旒鸞轟聲明守器宣華訪安永福上漏驂

軒初晨戒服慶色伊蒲奠儀載肅至誠莫感遐福空辭
氛程月志祲動年司素妓犯列青雲失滋中楹軫夢當
戶陳詩楚藥毀方秦醫反轍高議虛演竒文徒說遠賓
上靈長違昭世痛結宸慈哀震華棣嗚呼哀哉軒帷高
寂庭帳深陰鶴闕晝掩鳬燈夜沈仍襲未改容饌如臨
暖徽儀而可慕標嗣子之純心嗚呼哀哉韋弁告期麻
衣請日辨域展圖揚龜獻吉文物充階具僚在位總葭
挽之哀淒視風煙之騷瑟嗚呼哀哉飾麾輅而南指轉

旌羽而北徂車結軫於雕轂馬緩轡於金蘇寄靈心於
萬象增戀戀於國都嗚呼哀哉光徙靡而欲沉山荒涼
而遂晚城闕緬而何期平原忽而超遠情有望而弗追
顧如疑於將返嗚呼哀哉 梁王筠昭明太子哀策文

曰蜃輅戕軒龍駟跼步羽翾前驅雲旗北徂皇帝哀繼
明之寢曜痛嗣德之徂芳御武帳而悽慟臨甲觀而增
傷式稽令典載揚鴻烈詔撰德於旌旂求傳徽於舞綴
其辭曰式載明兩實惟少陽儀天叱峻儷景騰光睿哲

膺期旦暮斯在識洞機深量包瀛海立德不器至功弗
宰寬綽居心溫恭成性循時孝友率由嚴敬咸有種德
惠和齊聖括囊沈略包舉藝文徧該絀素殫極丘墳騰
表充積儒墨區分瞻河闡訓望魯揚芬雲物告徵履沴
褰象星霾恒曜山積朽壤威儀上賓德音長往具僚無
陰諮丞安仰嗚呼哀哉首夏司開麥秋紀節容衛徒警
菁華萎絕書幌空張談筵罷設虛饋饒饒孤燈翳翳鳴
呼哀哉簡辰請日筮合龜貞幽埏風啟元宮獻成武校

齊列文物增明昔遊漳水賓從無聲今歸郊郭徒御相
驚嗚呼哀哉背絳闕以遠徂轡青門而徐轉顧馳道而
詎前望國都而不踐凌脩坂之威夷遡平原之悠緬驥
蹠足以駿嘶挽悽鏘而流泣嗚呼哀哉混哀音於簫籥
變愁容於天日維夏木之森陰反寒林之蕭瑟既將反
而復疑如有求而遂失謂天地其無心遽永潛於容質
嗚呼哀哉

原詔後魏溫子昇魏莊帝生皇太子赦詔曰有國三善

事屬元良本枝百世義鍾繼體朕應天纂命握圖受籙
景祚維新十年以永今日吉辰皇子誕育彩雲映日神
光照殿方開博望將起龍樓遠近同歡人神共悅便可
大赦天下

原教魏文帝答卞蘭教曰賦者言事類之所附也頌者
美盛德之形容也故作者不虛其辭受者必當其實蘭
此豈吾實哉昔吾丘壽王一陳寶鼎何武等徒以歌頌
猶受金帛之賜蘭事雖不諒義足嘉也今賜牛一頭

增制唐內制冊平王為皇太子文曰咨爾平王隆基幼而聰允長而寬博有夙成之量焉爾有文武仁孝之德以知君臣父子之道朕甚休之間者賊臣構逆窺窬神器則我有唐之祚危若綴旒爾義刑邦家忠衛社稷誅其兇惡以之康濟主七鬯者非爾而誰是用命爾為皇太子古人有言曰爾身克正罔敢不正人心罔中惟爾之中昭昭臨下不可不畏慎簡乃僚允迪端士恭儉惟德遠於儉人則萬邦以貞庶答揚我四聖之鴻烈敬之

哉又開元三年冊郢王為皇太子制曰於戲書不云乎一人元良萬邦以貞易不云乎黃離元吉得中道也將以守監從撫主器承祧執經陳東序之容端冕見南郊之禮本枝百代宜哉福祉咨爾郢王嗣謙忠肅恭懿元亨利貞遵在鎬之惠慈稟生譙之祥應學能知道孝乃因心書及春卿懸知早秀言窮叔譽遠愧生知當試象之年備成人之敏正位少陽欽惟大典是用命爾為皇太子其在靖恭爾位聿脩厥德詩書禮樂敦說為本

父子君臣威儀罔忒寢門問豎必視寒暄望苑招賢用
資端直使三靈合契四海係心延我累聖之業積爾重
輝之慶必敬必戒無怠無荒往惟欽哉可不慎歟

增詔唐立晉王為皇太子詔曰昔者哲王受圖上聖垂
範建儲貳以奉宗廟總監撫以寧邦國既義在於至公
亦事兼於權道故以賢而立則王季興周以貴而升則
文帝定漢詳諸方冊豈不然乎并州都督右武侯大將
軍晉王治地居茂親才惟明哲至性仁孝淑質惠和夙

著夢日之祥早流樂善之譽好禮無倦強學不怠今承
華虛位率土繫心疇咨文武宜所推戴古人云知子莫
若父知臣莫若君朕謂此子實允衆望可以則天作貳
可以守器承祧永固百世以貞萬國宜立某為皇太子
可令所司備禮冊命

原表魏卞蘭贊述太子表曰伏惟太子研精典籍留意
篇章覽照幽微才不世出稟聰叡之絕性體明達之殊
風慈孝發於自然仁恕洽於無外是以武夫懷恩文士

歸德竊見所作典論及諸賦頌逸句爛然沈思泉涌華藻雲浮聽之忘味正使聖人復存猶稱善不暇所不能間也昔舜以蒸蒸顯其德周旦以不驕成其名豈因南面之尊以發稱假鼎足之盛以取譽哉夫至尊至貴能令人畏不能令人譽故桀不能變龍逢之心紂不能易三仁之意懷近服遠非德無施今太子博納多容海濔岳峙學無常師唯德所在思無所思唯德所親觀士察人毫毛無失望色則知其情覽始則達其終遏偽辯於

未言絕讒巧於未形其所以包羅殊類鑑觀成敗德生
於性明出自然太子所行晏然休著皆羣下所常吟詠
誠不復須臣贊揚懿美褒稱盛行然後令夜光之璧顯
於金匱隋侯之珠彰於韞櫝者也今相鍾繇大理王朗
海內英儒國家柱臣博物多識通洽君子年耆德茂所
更多矣若游海者難與論水覩前世者不可為言然咸
歸太子巍巍之美叙述清風言之有承聽者欣欣忘日
之夕流景耀於無窮布芳陰於四遠譬則麟龍發足羣

獸追蹤鸞鳳舉翼衆鳥隨風小臣區區嘉樂無已竊怡
綿綿之屬忘愚戇之言謹觸冒上賦一篇以摠狂狷之
思 梁簡文帝上昭明太子集別傳等表曰若夫正少
陽之位主承桃之則口實為美惟稱啟誦自茲厥後罕
或聞焉昭明太子稟仁聖之姿縱生知之量孝敬兼極
溫恭在躬明月西流幼有文章之敏羽籥東序長備元
良之德非假二疏寧勞四皓虎賁恧其經學智囊慙其
調護豈止博望延賓壽春能賦問疑棗據書戒憑陵而

已哉玉折何追星積靡續地尊號嗣外陽之術無徵位
比周儲緱山之駕不返臣以不肖妄作明離出入銅龍
瞻仰故實思所以揄揚盛軌宣記德音謹撰昭明太子
別傳文集請備之延閣藏諸廣內永彰茂實式表洪徽
任昉為皇太子求一日入朝表曰臣聞內豎告安姬
昌怡色鳴雞戒旦周發冠履或以涼燠之候晨昏異宜
膳羞之和鼎飪殊節一辰三朝稱情猶簡終日承顏在
理斯愜且長壽之對撫循無已馳道未窮顧懷不輟豈

直下動天性固亦上結慈哀自頃半旬乃朝遂為通制
事踰信次義乖晨省一日萬幾不敢三塵御省每旦改
宿特乞一至寢門 蕭子範求撰昭明太子集表曰臣
聞姬昌云亡播禮樂於百代宣尼既歿傳雅頌於千祀
夏啟之風載傳樂野周晉之迹止在洛濱入侍四公西
京見美長壽一察東漢流名魏擊之悟篋衣事關戰國
孫登之愛田苗義屬偏霸各稱小善靡擅雕蟲子桓雖
詩賦可嘉矩範頓闕貽譏良史取誚前載備而為論發

奧允歸自少陽潛位震方滅采神儀長往銅龍毀構音

顏緬邈舟壑遷移若乃緣情體物繁絃縟錦縱橫艷思

籠蓋詞林積練累素盈車滿笈金石有銷斯文方遠既

異陳王之躬撰又非當陽之自集臣蟬翼輕身未從塵

露而班輸嚴駕永輟駢驂戀主懷茲伏深涕慕冒乞銓

次遺藻勒成卷軸 陸倕為豫章王慶太子出宮表曰

臣聞周固本支實資明兩漢啟盤石必係元良所以闡

弘祚鼎光崇守器伏惟皇太子道契生知照均天縱不

藉審諭之功無待溫文之輔而冬書秋記夙表睿資春
誦夏絃幼彰神度雖復直門守令長壽察微魏贊多容
漢稱寬博不足以連輝茂則匹景令圖甲觀惟新桂宮
告始朱班徙次翠蓋移陰華裔式瞻人祇蹈舞 周庾
信慶傳位於皇太子表曰昔者降居若水登庸有優劣
之殊來朝櫟陽繼體有君臣之異不得與夫天之兩旦
日之再中並曜連輝重明雙照同年而語矣欲令百工
相和先聞揖讓之風天下無為早識吾君之子皇帝貌

然姑射正當乘雲馭龍問道崆峒豈復先秋木落 增

唐常袞為代宗讓皇太子表曰臣聞君父之命誠不合
辭臣子之心固無所隱臣所以省躬審分讓德推賢瀝
懇上聞冒嚴亟請丹誠罔感皇睠來昭戰兢失圖精爽
飛越伏以國之上嗣古曰元良觀象於天應前星之環
極取法於地視少海之朝宗必訪耆龜以承主鬯臣幼
非樂善長未好儒慈獎特深愚蒙不易教之羽籥有味
樂章訓以詩書終迷義府遊虧四老才乏五官人莫係

心德非守器頃者外統羣帥內錄尚書竊懼任榮以憂
官謗今謬塵博望猥辱壽春位登青宮禮絕朱郎且乖
人望載黷朝經循名責實未足承天之序捨長立賢亦
猶行古之道伏惟陛下博求公議允納微誠更擇溫文
俾膺繼紹遠想伯夷之讓用升季歷之材至公大行天
下幸甚無任懇迫屏營之至 皇太子請停幸東都表
曰臣聞乘雲駕羽者非以逸樂其身觀風設教者將以
弘濟於物故後子胥怨幾望湯來吾王不遊嘗思禹會

伏惟天皇察帝道敷皇極一日二日智周於萬幾先天
後天化成於四序雖鴻名已建銘日觀而知尊而膏澤
未流御雲臺而不懌市朝之邑天地所中四方樞會百
物阜殷爰降恩旨行幸東都然以星見蒼龍日纏朱鳥
清風用事庶彙且繁桑翳葉而眠蠶麥飛芒而雉雉詳
求易緯是君無發衆之辰博訪禮經當人急勸農之月
固未可陳詩展義拜洛觀河况序屬亢陽時方避暑露
臺風館尚多薰灼之勞帳殿帷宮將有鬱蒸之弊天皇

昔常服餌近更躬親睿情勤苦天儀憔悴若何以萬乘
之重四海之尊暴露而行旰日而食者也必若事應巡
狩務從寬恤猶望白露涼風然後清飴灑道下不違於
人欲上無隔於天心可舉而行庶幾於此臣又聞關中
屬縣畿內傍州百姓驅馳頗多饑餒天皇仁深覆育並
令賑贍求轉徙者任其逐糧欲寧居者加其廩食家懷
再造人得安全乞至秋來不煩聖慮特乞少留玄鑒俯
察丹誠迴太陽之末光納蒙泉之餘瀝臣三朝問寢常

候色於宸慈五日詣臺每承言於聖獎輒陳冗職輕進
芻詞踏地知驚窺天自失無任私懇之至 皇太子請
復膳表曰臣聞善持國者舒慘必繫於天時德稱皇者
動靜莫違於物理故百姓不足一人所以載懷四海為
家萬方由其在慮伏惟天皇觀風設教拜洛遊河光華
前乎日月法象齊乎天地頃以歲儲微耗年穀未登睿
旨憂勞宸情戒惕菲飲食而卑宮室居常夏禹之期減
厨膳而徹鍾懸重取黃軒之事由是神靈盼嚮景氣氤

氤雪千里而朝飛雨四溟而夜下兩河之甸瑞麥盈疇
三川之境嘉苗被隰天意人事其在茲乎可以隨道抑
揚可以與時通變周王之本枝百代每進鮮庖殷帝之
亢旱七年猶資鶴鼎昔賢具稱其美往聖不議其非唯
此小心將乖大德臣又聞下之奉上猶枝附根君以人
作基人以君為命天皇恩深子育念切家安損已勵精
無違早晏停滋罷味已隔歲時伏乞俯從人欲仰順靈
心具珍物以登羞隨太陽而復膳萐莆知送涼之地芝

英識駐壽之期豈使眇眇燧皇獨流名於燔炙悠悠黃
帝空紀稱於庖犧而已哉臣寄忝元良任當監守春冬
胄序學書禮而空勤朝夕寢門視寒溫而未即 皇太
子請脩書表曰臣聞昔者明王學以化人成俗古之君
子文以緯地經天雖有閭風之高嶽弗登弗知其峻也
雖有浴日之巨溟弗涉弗知其廣也伏惟天皇域中居
大天下化成百官以理萬人以察日行中道而淑清歲
起攝提而位序光薰萬物豈直芝珥莫瑯澤加四海寧

惟壽麻孤竹地成形而天成象其道彌光河出圖而洛
出書其徵可驗環林壁沼金門石室墳典積於丘山筆
墨盈於泉海聖朝多士自可包二代之文臣顧不才何
足奉三王之教皇慈渥洽帝獎優隆擢公望為太師徵
子房為少傅所冀習與智長化與心成嘗辛苦於歲餘
終未階於日就臣聞學者殖也問以辨之積必有成勤
則不匱以周公之上聖日讀百篇以孔父之多能韋編
三絕臣雖不敏竊所庶幾然以列代遺章先王舊典康

成興業纔覽卷於八千士安覃思願加年於累百豈不以學而時習博則難精者乎今欲寡其蕭稂撮其樞要可以出忠入孝可以益國利人極賢聖之大猷盡今昔之能事商權百氏勒成一家庶有代於箴規長不違於左右又近代書鈔實繁部帙至如華林園徧略脩文殿御覽壽光書苑長洲玉鏡及國家以來新撰藝文類聚文思博要等並包括弘遠卒難詳悉亦望錯綜羣書刪成一部藝宮賓館亦既天皇立之矣端士正人亦既天

皇致之矣伏乞俯從微願特降鴻私許臣撰竊遂臣誠
請當宮學士如少仍望通取京官謹當開桂樹之山鑿
芙蓉之水引甘泉之詞賦總望園之賓客下芸閣而長
謠臨梓池而高會一遊蘭芷佇變蓬麻區區之誠敢希
矜允豈使肅城門內唯傳魏國之名崇政殿中獨紀晉
朝之事而已 柳宗元百寮賀冊皇太子表曰臣聞商
書載以貞之文漢史傳早建之義不惟立愛其在繼明
陛下奉率前規敷揚盛典顧茲守器之重爰正承華之

位尊義方之教載錫嘉名崇建樹之禮式光典命以長
而立自符於慎擇必子而選遂合於至公邦本不搖王
業彌固此皆宗社垂祉啟祐皇心乾坤叶謀保安聖運
足以播休氣於四海洽太和於萬靈食毛含齒所同歡
慶臣等奉承制命蹈舞周行不任歡抃之至 宋人賀
立皇太子表曰春宮貳極有開震索之祥寶冊揚庭庸
鼓巽申之號慶闕九廟風動四方恭惟堯大難名舜恭
允塞天職覆地職載莫喻休功月重輪星重輝益圖大

計眷乃承祧之重居無在傳之勤爰涓選於剛辰俾光
膺於殊禮臨軒出令示一人有慶之符主鬯得人兆萬
世無疆之福照臨所迨頌詠惟均臣昔參綺皓之遊今
辱嚴徐之侍靈源暨遠子孫與有於榮懷忭悃發中手
足不知其舞蹈

增啟唐張說上東宮勸學啟曰臣聞安國家定社稷者
武功也經天地緯禮俗者文教也社稷定矣固寧輯於
人和禮俗興焉在刊正於儒範順考古道率由舊章故

周文王之為太子也崇禮不倦魏文帝之在春宮也好古無怠博覽史籍激揚令聞取高前代垂名不朽伏惟皇太子殿下英睿天縱聖敬日躋神算密發雄威立斷廓清氛祲用寧國家兆人由是歸德六合所以推功主鬯青宮固本也分務紫極觀政也副羣生之望作累聖之儲殿下之於天下可謂不輕矣監國理人可謂至重矣莫不拭目而視清耳而聽冀聞異政以裨聖道今禮經殘缺學校陵遲歷代經史率多紕繆實殿下闡揚之

日刊定之秋伏願博採文士旌求碩學表正九經刊考
三史則聖賢遺範粲然可觀況殿下至性神聰留情國
體幸以問安之暇應務之餘引進文儒詳觀文典商略
前載討論得失降溫顏開讜議則政途理體日以增益
繼業承祧永垂德美臣等行業素輕藝能寡薄顧慙端
士叨侍宮闈日夜祇懼無以匡輔區區微誠願効塵露
輕進芻鄙庶垂採擇

手令答曰經史脫誤事資刊理自非通儒孰詳太義侍

讀等升堂觀奧能定闕文今司經崇文皆有舊籍敬承
來教即令考序頃日以來未暇數對何嘗少選而忘德
音尋當叙進羣英冀聞餘論仍令錄留啟本以代書紳

太孫一

增太平御覽曰漢成帝元帝太子也為世嫡皇孫宣帝
字曰太孫 又曰晉趙王倫既廢賈后皇帝使使持節
追復愍懷太子拜皇孫臧為臨淮王尚為襄陽王又詔
立臧為皇太孫文武官屬即轉為太孫官屬車服侍從

皆愍懷之舊也趙王倫篡位太孫廢薨惠帝復阼立襄陽王尚為皇太孫 又曰惠帝詔以太常成粲為太孫太傅校尉梁柳為太孫少傅 又曰後魏高宗景穆帝之長子也帝少聰達太武常置左右號世嫡皇孫 又曰後周建德二年皇孫衍生文武官皆晉秩 又曰齊文惠太子長懋世祖長子也世祖年未弱冠而生子為太祖所愛建元元年封南郡王江左未有嫡皇孫封王始自此也 唐書曰中宗子重潤帝為太子時生東宮

高宗喜甚乳月滿為大赦天下改元永淳 又曰高宗

將立皇太孫問吏部侍郎裴敬彝郎中王方慶對曰禮
有嫡子無嫡孫漢魏太子在子但封王晉立愍懷子為
皇太孫齊立文惠子為皇太孫皆居東宮今有太子又
立太孫於古無有帝曰自我作古若何對曰禮君子抱
孫不抱子孫可以為王父尸者昭穆同也陛下肇建皇
孫實千億之慶帝悅詔議官屬敬彝等奏置師傅友文
學祭酒左右長史東西曹掾主簿管記司錄六曹等官

加王府一級然卒不補後中宗失位太孫廢死重潤秀容儀以孝愛稱死不緣罪人皆流涕 宋史曰欽宗子

諱政和七年生為嫡皇孫祖宗以來所未有徽宗喜

金史曰世宗八年上遣宣徽使移剌神獨幹以名馬寶刀御膳賜皇太子及妃仍諭之曰妃今臨蓐願平安得雄有慶之後宜以此刀置左右既而皇孫生是為章宗上幸金蓮川次冰井翌日上臨幸撫視宴甚歡謂太子曰祖宗積慶皇后陰德至厚而有今日社稷之福也

明紀事本末曰建文生十年而懿文太子薨太祖年六十有五矣御東角門對羣臣泣翰林學士劉三吾進曰皇孫世嫡富於春秋正位儲極四海繫心皇上無過憂太祖曰善九月立為皇太孫 又曰太祖親立諸王世子時秦晉燕周四世子太祖皆教而試之一日使分閱衛士燕世子還獨後問之對曰寒甚士方食太祖喜使閱章奏擇可施行者報命太祖益愛之 通紀曰成祖以皇太孫生長深宮欲其知稼穡艱難因令從行北京

使周行邨落歷觀民情風俗及田野農桑艱苦之事且舉太祖創業之艱及往古聖賢之君昏亂之主興喪得失可為鑒戒者以致飭勵之意書成名曰務本之訓云

太孫二

增慶宴

太平御覽曰唐貞觀十七年誕皇太孫宴宮僚於弘教門太宗幸東宮自殿北門入謂宮臣曰

會有甲觀之慶

出閣

通紀曰永樂五年皇長孫出閣就學年九歲命太子少師姚廣

故就卿為樂耳

孝翰林侍詔魯瑄

開府

唐書曰高宗為皇太孫重潤置官屬睿宗長子憲武后

鄭禮等侍講讀

以睿宗為皇帝故憲立為皇太子睿宗降為皇

嗣更冊為太孫與諸王皆出閣開府置官屬

留守

太平御覽曰唐高宗將封嵩山召太子赴東都以太孫留守京師通紀曰永樂八年上將親征命皇長孫留守北

京

桑復生

太平御覽曰晉惠帝立臧為皇太孫桑復生於西廂長丈餘太孫廢乃枯

山為字

金史曰世宗謂李石赫舍哩志寧曰朕諸子雖多皇后止有太子一人今幸得嫡孫觀其骨相

不凡又生瑪達哈山山勢衍氣清

好聖孫

明紀事本末曰成祖

朕甚嘉之因以山名為章宗小字

命輔導

六年命丘福蹇

建儲猶豫未定遂召解縉預議縉言立嫡以長復曰好聖孫蓋指宣宗也

義金忠胡廣黃淮楊榮楊士奇金幼孜等兼輔導皇長孫諭之曰朕長孫天章日表玉質龍姿孝友英明寬仁

大度年未一紀夙夜孜孜日誦萬言必領要義朕嘗試之以事輒能裁決斯實宗社之靈卿等其悉心輔導

皇孫手書

太平御覽曰齊昭業立為太孫居東宮昭業少美容止好隸書世宗勅皇孫手書不

得妄出
貴重之

東宮圖記

通紀曰成祖榆木川之訃太子遣太孫出居庸赴開平迎梓宮瀕行

太孫啟曰出外有封章白事非印識無以防偽太子曰言良是但行急新製不及楊士奇曰殿下未踐阼有事自應行常用之寶其東宮小圖書可假之行此出一時之權歸即納上太子即取付太孫曰有啟事以此封識不久當歸汝汝可留之既行太子顧士奇曰昔大行臨御儲位久未定浮議誼騰今即以付之浮議何從興

一日見三天子

唐明皇臨澡皇嫡孫喜曰一日見三天子詳上

是第三箇

天子

太平御覽曰唐憲宗順宗長子六七歲時德宗抱至膝上問曰汝誰子在吾懷對曰是第三箇天子

德宗異而憐之貞元四年封廣陵王

家人子

史皇孫王夫人宣帝母也名翁須皇孫妻妾無號位

皆稱家人子

皇曾孫

漢書曰皇曾孫在獄望氣者言長安獄有天子氣上遣使者分條中都官

詔獄繫者一切殺之內謁者令郭穰夜到郡邸獄丙吉為獄吏閉門拒使者不納曰皇曾孫在他人無辜死者猶不可況親曾孫乎相守至天明不得入穰還以聞因劾奏吉武帝亦悟曰天使之也因赦天下郡邸獄繫者太子妃一

原班固白虎通曰妃者匹也妃匹者何謂也相與偶焉

古者天子後宮嫡庶皆曰妃

史記曰黃帝有四妃帝嚳有四妃虞舜有二妃

周以天子之正嫡為王后秦稱皇帝因稱皇后以太子

之正嫡稱妃漢因之漢書外戚傳曰太子有妃有良

娣有孺子妻妾凡三等是也魏晉以後咸遵之焉漢

書曰漢景薄皇后孝文薄太后家女也景帝為太子時
太后為太子取以為妃 又曰武帝陳皇后長公主嫖
女也初武帝得立為太子公主有力焉故欲以女納太
子 漢武故事曰初武帝為太子時長公主欲以女配
帝時帝尚小長公主指女問帝曰得阿嬌好不帝曰若
得阿嬌以金屋貯之主大喜乃以配帝是曰陳皇后阿
嬌后字也 又曰成帝許皇后平恩侯嘉女也元帝選
配太子上令中常侍黃門親近者侍送還白帝稱太子

欣悅元帝喜謂左右曰酌酒賀我左右皆稱萬歲王
隱晉書曰武帝欲為太子取配久而不決上欲娶衛瓘
女楊后欲娶賈充女上曰衛公女有五可賈公女有五
不可衛家種賢而多子端正而長白賈家種妬而少子
醜而短黑楊后既納寶物固欲娶賈氏因乃納之又
曰愍懷太子妃王衍女也劉曜入洛盡將諸后妃去妃
獨拔刀向賊曰我司徒公女皇太子妃死則已終不為
賊婦賊害之晉孝武起居注曰上臨軒設懸而不樂

遣兼司空謝琰納太子妃王氏賜文武布絹百官詣上
東門上禮 甲辰儀曰皇太子妃公主夫人逢持節使
者高車使者駐車相揖 東宮舊事曰皇太子納妃給
織成袞帶白玉佩四望車羽葆前後部鼓吹各一部

又曰太子納妃有七綵杯文綺被長命杯文綺袴 增
太平御覽曰齊文安王皇后名寶明建元四年冊為皇
太子妃無寵太子為宮人製新麗衣裳及首飾而后牀
帳陳古舊釵鈿十餘枚 又曰齊書皇太子妃厭翟車

漆畫輪車

又曰唐太宗后長孫氏年十三嬪於太宗

武德九年冊為皇太子妃 又曰開元中勅所選皇太

子及諸王等妃既是百官子女禮合避人今遣就本縣
及過本司未為得所其應預妃者令所司具名錄奏各

令女及近親隨使於命婦朝堂候進止 唐書曰肅宗

妃韋氏兄堅為李林甫搆死太子懼請與妃絕毀服幽

禁中 宋史曰英宗高后母曹氏慈聖光獻姊也故后

少鞠宮中英宗亦在帝所與后年同仁宗曰俟異日必

以為配及長遂成婚濮邸 又曰欽宗在東宮徽宗臨

軒備禮冊朱氏為太子妃 又曰度宗為忠王議納妃

初丁大全請選臨安府顧嵒女已致聘矣大全敗嵒亦

罷去臺臣論嵒大全黨宜別選名族以配太子臣僚遂

言全昭孫女從父仕宦備嘗艱險其處富貴必能盡警

戒相成之道乃冊為皇太子妃 金史曰顯宗孝懿皇

后圖克坦氏父貞尚遼王宗翰女梁國公主世宗初即位

貞為御史大夫自南京馳見世宗喜謂之曰卿雖廢主

腹心然未嘗助彼為虐况卿家法可尚其以卿女為朕
子妃及顯宗為皇太子大定四年備禮親迎於貞第世
宗臨宴盡歡是年封為太子妃 元史曰世祖出獵道
見緝駝茸女子歎羨之後與諸臣謀擇太子妃世祖俱
不允有一老臣嘗知向者之言知其未許嫁言於世祖
世祖大喜納為太子妃名必濟額格齊一名庫庫珍鴻
吉哩氏也

太子妃二

原金璽

瑜珮

璽沈約宋書曰皇太子妃金璽龜紐縵朱綬珮瑜玉

龍枕

鴨

燈

晉東宮舊事曰皇太子納妃有漆龍頭支髻枕一銀花環鈕自副

又曰皇太子納妃有金塗連盤鴨燈

一

文履

花簾

晉東宮舊事曰太子納妃有絳地文履一量又曰皇太子納妃有漆花

簾二具

龜鈕

雀鈿

上詳金璽注東宮舊事曰太子納妃有同心雀鈿一具

袞

帶

綺綬

上詳類聚有絳地織成綺綬又曰皇太子

四望車

九鈿

函

上詳類聚

晉東宮舊事

冊命

筮吉

晉起居注云元帝太

興元年上臨軒使冊命拜晉王妃庾為皇太子妃宋

書曰後廢帝仁皇后諱簡珪濟陽考城人北中郎長史

智深孫女太始五年太宗采訪太子妃而后父祖已

亡弟又弱小門無強蔭以卜筮最吉拜為皇太子妃

景殿

畫堂

漢書曰元帝為太子司馬良娣死後太子悲恚發病宣帝令皇后擇後宮家人子可

以娛侍太子者王禁女政君預焉時預擇者五人政君獨衣絳緣諸于使侍送入太子宮見於丙殿得御幸有身立為太子妃於甲館畫堂生子

即成帝也畫堂太子宫中之堂

稱萬歲

有五可

並詳類聚

司徒公女

新安主生

上詳類聚王隱晉書曰安僖皇后王氏字神

受太常王獻之之女新安公主生即安帝姑也孝武帝以後少孤無兄弟故為安帝納為太子妃孝武納采聘

太子妃王氏百官朱服會於新安

增盡孝

孝謹

唐書

公主第秘書監王操之為主人

曰高祖時隱太子繫閤已構秦王妃內盡孝事高祖謹

承諸妃消釋嬾猜元史曰太子妃濶濶真性孝謹善

事中宮世祖每稱賢德媳婦侍昭睿明聖皇后不離左

右至溷廁所用紙亦以面擦令柔軟以進妃生順宗成

宗

仁順

順適

唐書曰順宗良娣王氏以良家選入宮為才人順宗在藩帝以才人幼故

賜之是生憲宗王在東宮冊為良娣性仁順宮中化其德莫不柔雍順宗既即位病已縣頓后侍醫藥不少怠

宋史曰寧宗韓皇后六世祖忠獻王琦初后與姊俱被選入宮后能順適兩宮意遂歸平陽郡邸有

婦德

擇淑媛

唐書曰高宗太子弘妃裴居道女有婦德宋史曰英宗時神宗進封穎王時

禁中遣使泛至諸臣家為王擇妃韓維為王記室參軍上疏曰王孝友聰明動履法度今卜族授室宜歷選勲

望之家謹擇淑媛考古納采問名之

進掖庭

待進

義以禮成之不宜苟取華色而已

止太平御覽曰漢明帝馬皇后伏波將軍援小女也援征五溪蠻卒於師虎賁中郎將樂松等譖之由是家

益失勢又數為權貴所侵侮后從兄嚴不勝憂憤白夫人求進女掖庭乃上書曰臣叔父援幸恩不報而妻子

恃恩獲全戴仰陛下為天為父竊聞太子諸王妃匹未
構援有三女大者十五次者十四小者十三儀狀髮膚
上中以上皆孝順小心婉順有禮願下相工簡其可否
如有萬一援不朽於黃泉由是選后入太子宫唐書
曰開元十六年時太子瑛加元服詔九品官息女可配
太子者有司採閱待進止遂選太常少卿薛緇女為妃

教女儀

倚母家

宋史曰哲宗既長宣仁歷選世家
女百餘入宮孟后年十六宣仁及

欽聖向太后皆愛之教以女儀唐書曰代宗天寶中
封廣平王時貴妃楊氏外家貴冠戚里秘書少監崔珣
妻韓國夫人以其女女皇孫為妃生子德所
謂召王者妃倚母家頗驕媚諸楊誅禮寢薄

黑鳳集

營白雁入苑

宋史曰光宗李皇后慶遠節度使道之
女初后生有黑鳳集道營前石上道心

異之遂字曰鳳娘道士皇甫坦善相人道出諸女拜坦
坦見后驚曰此女當母天下坦言於高宗遂聘為恭王

妃乾道七年立為皇太子妃 唐書曰高宗時太子弘
納妃有司奏贊用白雁適苑中獲之高宗喜曰漢獲朱

雁作為樂府今得白雁為婚
贊婚乃人倫首我則何慙

親執庖爨 護侍起居

明紀事本末曰永樂間上及后御便殿東宮妃張氏親
執庖爨上御膳恭謹上大喜曰新婦賢他日吾家事多
賴也自此無易儲意 懿宗妃郭氏幼入鄆王邸宣宗
在位春秋高惡言立太子事王以嫡長居外宮心常憂
惴妃護侍左右慰

禮異諸婦

宜配冢嫡

唐書曰憲宗妃郭氏

汾陽王之孫順宗以其家有大功烈而母昇平公主素
貴故禮之異諸婦 宋史曰理宗語大臣曰全氏女言
辭甚令宜配冢嫡以承
祭祀遂冊為皇太子妃

原詔唐太宗冊蘇亶女為太子妃詔曰配德元良必俟

邦媛作儷儲貳允歸冠族秘書丞蘇亶長女門襲軒冕
家傳義方柔順表質幽閑成性訓彰國史譽流邦國正
位儲闈實惟朝典可皇太子妃所司備禮冊命施行

原冊文唐太宗冊太子妃文曰惟爾秘書丞蘇亶長女
族茂冠冕慶成禮訓貞順自然言容有則作合春宮實
協三善曰嬪守器式昌萬乘備茲令典仰惟國章是用
命立為皇太子妃惟欽哉其光膺命可不慎歟

原哀冊宋謝莊皇太子妃哀冊文曰楹凝桂酒庭肅龍

輶風吹國輅雲起郊門皇帝傷總綏之掩綵悼副禕之
滅華行光既晏長河又斜顧而言曰璇璫有毀郁烈無
湮翦素裁簡授之史臣其辭曰霍岫虧天濤流凝漢祥
發桐珪慶昭金算毓景帝里飛芳戚閑秘儀施谷升音
集灌月晷幾望娣袂維良釋幃春宮承飾少陽五葉衍
藻四訓抽光歲蕤蕙振婉嬖瓊相清徽就遠祲沴方搏
臨華罷翠當曄收蘭複殿生響長廡結寒節移虛饋氣
變容衣中庭草暖階上螢飛傷紫里第痛溢朝闈霜侵

燭昧風密帷淒驚葭夕轉龍驂夜嘶筵既訣兮奠既徹
背青闕兮去神閨旌掩鬱而還泛蓋逶遲而顧低素紉
斂維華輶鮮馭山燧恒陰松阿不曙離天涯兮就銷沈
委白日兮即冥暮菊有秀兮蘅有芬德方遠兮聲彌樹
齊王儉皇太子妃哀策文曰肇惟初識芳猷夙就翩
翻禮園徘徊樂園視秋齊明方春等茂伊宋之季天衢
薦阻咨我儲貳締縉江許衛女事齊樊姬贊楚美著嬪
嗣徽音踵武數盈則反否極斯昌肅膺靈命經緯三光

往儀衡館來式椒堂糾組成事象服有章八演仰則六
幽望景悠悠草昧如何不永方中委曜先秋落穎世有
遺塵庭無餘影嗚呼哀哉遵三兆之嘉日迨九筮之靈
期澄金波而映鑒旆命飛廉而拂瓊輜揚清笳於漢表
動嘶挽於雲基

御定淵鑑類函卷五十九

謹案卷五十九第二十二頁後四行輝罕舊作忽

汗 二十四頁前六行烏哲舊作屋質 又前

七行烏裕舊作兀欲 又後三行案班貝勒舊

作諳班勃極烈 二十五頁後七行布斯必舊

作伯必 又八行阿巴齊舊作阿八赤 二十

六頁前七行阿哈瑪特舊作阿合馬 又塔奇

呼阿薩爾舊作塔即古阿散 又後四行阿裕


錫哩達喇舊作愛猷識理達臘 又六行托克

托舊作脫脫 四十二頁後八行扎拉固舊作
扎刺忽 四十三頁前一行色勒敏舊作撒里
蠻 又二行巴延舊作伯顏 七十四頁後三行
赫舍哩舊作紇石烈 又四行瑪達哈舊作麻
達葛 七十八頁前七行圖克坦舊作徒單
又後六行必濟額格齊舊作伯藍也怯赤今並
改後倣此

謹案第四頁前一行今能無愛金玉刊本玉訛欲
據史記改

第二十五頁前五行劉秉忠刊本忠訛中據元史
改

第二十六頁前四行詹事張九思曰刊本張訛孔
據元史改



總校官庶吉士臣張能照

校對官編修臣裴謙

謄錄監生臣金拔